


# *KLISTO ME MONISAMA NA KATI YA NDIINGA YA YANDI MOSI*

 Beto kulumusa bayintu ya beto.

Mfumu Yesu, Mvungi ya Mameme ya nene, beto ke na kudefa Nge mingi, Mfumu, ti beto lendaka ata mbala ve kufuta Nge samu na zola yina Nge me mwangisa na kati ya bantima ya beto. Beto ke kukitala ya kulunga ve na yina beto me kulumusa bayintu ya beto mpe me telama na Ntwala ya Nge. Beto ke lomba Nge na kusukula beto na bafoti mpe masumu nyonso. Beto ke sambila ti Nge ke pesa ngolo na banzutu ya beto bubu yayi. Bantu mingi kele ya kubela mpe kele na mpasi, mutindu ya ke lakisa awa, na bamuswale mpe balombilu yina ke na kwiza na alo-alo mpe bisika nyonso.

<sup>2</sup> Mpe beto ke kwikila ti beto ke na kumanisa disolo ya yinza yayi ntangu yayi, mpe ntama mingi ve ntangu ke sulumuka na Seko, mpe beto zola kukubama samu na ngunga yina. Ya kele samu na yina beto me vukana awa na suka yayi, ya kele samu na kuyilima na ntangu yina. Ba me tuba na munu ti ya kele na bantu mingi kele ya kunamika na alo-alo na suka yayi na bisika nyonso na yinsi, kubanda simu na simu. Kisika nyonso bandinga ya beto ke kuma, ti mwa kimvuka yina kuzwa lusakumunu. Belusa bambevo yina kele na kati ya bawu, mpe mu ke sambila ti Nge ke vedisa myoyo ya bawu na yimbi nyonso. Mpe sadisa beto awa na suka yayi, na tabernacle, ti beto mpe lendaka sepela ntangu yina ya nene.

<sup>3</sup> Mpe beto ke lomba ti Nge ke zonza na beto bubu yayi na nzila ya Ndinga ya Nge yina sonamaka, mpe ti Mpeve kutalisa na beto bima yina beto ke na yawu nsatu, mutindu beto me vukana yinsi ya muvimba na ntangu yayi, na kutalaka ti beto kele bantu ya fyoti, kasi kele na kisika na kati-kati ya bantu ya kuvulusa, samu ti beto me kwikila na Yesu Klisto. Pesa beto bima yayi, Mfumu.

<sup>4</sup> Mpe ntangu beto ke manisa lukutakanu mpe beto ke kwenda na mosi na mosi ya bayinzo ya beto na bisika nyonso na yinsi, ti beto tuba, mutindu bayina katukaka na Emmaüs, “Bantima ya beto vwandaka pela ve na kati ya beto na yina Yandi vwandaka zonza na beto na nzila?”

<sup>5</sup> Ntangu yayi, Tata, mu zaba ti nyonso yina mu ke tuba ke vwanda ya kieleka ya kulunga ve, na Baklisto ya mbote na kati ya yinsi ntangu yayi yina kele ya kunamika, ya ke vwanda ve—ya ke vwanda ve ya kulunga. Ya ke vwanda ve na kima yina mu lendaka tuba yina lendaka sala mbote mosi, samu ti beto nyonso kele na kategoli mosi. Beto kele bantu, bayina ke kufwa.

Kasi bika Mpeve-Santu ya nene kuzonza; ti Yandi baka Ndinga mpe kumonikisa kaka Yandi mosi. Beto ke na kuingila na Yandi ntangu yayi, na Nkumbu ya Yesu. Amen.

Beno lenda vwanda.

<sup>6</sup> Ya ke mutindu ya . . . kuyituka munu mosi. Mu tubaka na kento ya munu, kana yandi lendaka kuwa, kuna na Tucson, ti mu banzaka ve ti mu ke kuzwa lukutakanu mosi ntangu mu ke vutuka; mpe mu nataka ve kaka bilele. Mpe mu tubaka na bokilo ya munu ya kento, yandi womaka kazaka ya munu, mpe mu tubaka, “Mu ke vwanda na manima ya chaire, na . . . Bawu zaba ve ti pantalo kele mutindu mosi mpe kazaka mutindu yankaka.” Ya kele yina mu ke lwataka na yinzo. Kasi, Meda, yandi womaka semisi ya munu mpe nyonso, na yawu konso . . . Kuvwanda na boma ve; nyonso kele mbote.

<sup>7</sup> Ntangu yayi, beto kele na ndombolo awa, ti ya kele na mpangi mosi ya bakala ya luzolo mingi . . . Mpe mu banza ti—ti Prescott, mu banza, ba kele ya kunamika na suka yayi, kuna na—na Prescott, na Arizona. Tata ya Mpangi-kento Mercier vwandaka kaka na nzila ya yandi awa na lukutakanu, mu me kuwa, mpe ba zolaka nata yandi na lupitalu samu ntima kukangaka, ya kele Mpangi ya bakala Coggins. Mpe, dyaka, Mpangi ya bakala Junior Jackson, mu banza ti yandi ke na kulanda na ladyo yina kele pene-pne, to na alo-alo yina kele pene-pene na Clarksville to na New Albany, mpe tata ya yandi kele na lupitalu, mu me kuwa, ke luta na kupasula ya mpasi ya cancer na dizafu. Na yawu beto zola ya kieleka kubambuka moyo na bawu na bisambu ya beto. Mpe ntangu yayi ya kele na bayankaka awa, mpe, kasi beto zola ve kubaka ntangu. Nzambi zaba bawu nyonso, na yawu beto sambila samu na bawu ntangu yayi.

<sup>8</sup> Nzambi ya luzolo, na yina bakala yina ya luzolo, ya kiboba, ya maboko ya mifutu, Mpangi ya bakala Coggins, mpe veteran ya ntama ya mfinda, kele . . . ya kulala na lupitalu na suka yayi, kisika mosi kuna, yandi kele na mpasi na ntima ya yandi. Nzambi, ntima yina ya mputu ya ntama me lutila na bampasi mingi. Mu ke sambila, Nzambi, kusadisa yandi. Pesa yawu. Yandi zola . . . Yandi ke zolaka luzingu mutindu beto nyonso ke salaka, mpe yandi zola kuzinga. Mfumu Nzambi, pesa yawu. Beto bisika nyonso na yinsi ke sambila na Nkumbu ya Yesu samu na yandi, ti Nge ke belusa yandi mpe ke basisa yandi. Beto ke kwikila ti Nge ke sala yawu; ti yandi ke kwisa kaka na lukutakanu.

<sup>9</sup> Beto ke sambila samu na Mpangi ya bakala Jackson, papa ya yandi ya ntalu kele ya kulala kuna pene-pene na lufwa ntangu yayi, mpe yandi me buta na yinza mwana ya bakala mosi ya mbote mutindu Junior. Mu—mu—mu ke sambila, Nzambi ya luzolo, ti Nge ke belusa yandi. Mu zaba ti ya ke monana ya

lendaka salama ve. Minganga, badokotolo, bawu—bawu zaba ve yinki ya kusala na mutindu ya dyambu yina. Kasi beto ke bambuka moyo na Mpangi ya bakala Hall, mpe, na yina minganga ya kulutula mbote awa tubaka, na Louisville, tubaka, “Yandi kele kaka mwa bangunga fyoti samu na kuzinga,” na cancer na dizafu. Mpe yandi ke na kuzinga bubu yayi, mpe yina me luta bamvula makumi zole na tanu, samu na lemvo ya Nge. Na yawu mu ke sambila ti Nge ke belusa Mpangi ya bakala Jackson bubu yayi, Mfumu, ti lemvo mpe kyadi ya Nge kuvwanda na yandi.

<sup>10</sup> Mpe kikunku nyonso yayi ya nene ya bamuswale mpe bilele mpe nyonso yina kele awa mutindu ndombolo; Nge zaba bawu nyonso, Tata. Mu ke sambila ti Nge ke pesa kubeluka na bawu nyonso. Na Nkumbu ya Yesu Klisto. Amen.

<sup>11</sup> Ntangu yayi na kubanda, na suka yayi, na kisika ya ntete, mu vwanda banza ve ti mu zolaka kwiza, Lumingu me luta. Mpe na yina dyaka, ntangu beto samunaka yawu, mu ke kwiza. Mpangi Neville me sala munu kulonga! Mpe kuna beto samunaka kuvwanda bubu yayi, mpe ba me pesa ve nsangu bisika nyonso na yinsi samu na bantu. Mpe beto me kuzwa sysiteme yayi ya alo-alo ntangu yayi, ya kele kieleka, kieleka mbote. Bantu lenda vwanda kaka na bayinzo ya bawu to na ya bawu. . . kuvukana na bisika ya bawu, na mabuundu ya bawu, mpe nyonso yina, mpe kuwa lukutakanu. Mu ke sepela na yawu.

<sup>12</sup> Ntangu yayi mu ke na kumona na zulu awa, ya kele na bandombolo mingi ya sabala yayi me luta, na zulu ya yina mu tubaka na Nsangu ya Lumingu me luta. Mu banza ti ntangu yayi mu me zimbana mutindu mu bokilaka yawu. Kasi mu tubaka kima na zulu ya yina me tadila kufuta bamfuka ya beno. Mpe beno zaba, ata yina beno ke tuba, ya ke wakana yimbi samu na bantu mingi. Ya kele ve samu ti bawu. . . bawu zola ve kuwa yawu, kasi beno ke kuwa kaka yawu kaka yimbi.

Mpe ntangu yayi muntu me tuba, “Beto lenda sumba ditoma?” To, “Yinki mu lenda. . .”

Ntangu yayi, yina kele ve yina Yesu tubaka, to Biblia kuna, yina ke tuba, “Beno defa ve muntu kima.” Ya kele bamfuka yina me kuma bilumbu yina beno lendaka futa. Beno futa yawu. Ya kele ve. . . Yina kele ve kudefa kima. Ya zola tuba ve. . . Oh, beto ke defa yinzo ya beto, mbongo ya alo-alo ya beto, beto. . . mpe nyonso yankaka. Beto—beto ke defaka bima yina, mpe beto ke futa yawu. Kasi, mfuka ya ntama yina me kuma bilumbu, yina beno lendaka futa, beno futa yawu. Beno me mona? Ntangu yayi, beno kwenda ve na kima na zulu ya beno mutindu yina.

<sup>13</sup> Mu ke bambuka moyo na ntangu mu vwandaka bela, na ntangu mu vwandaka mwana ya fyoti ya bakala. Mu basikaka na lupitalu na mfuka ya pene mafunda zole ya ba-dollar. Mpe ya vwanda vwandaka na Palamasi awa, ya Tata Swaniger, mu

defaka yandi pene ya mafunda tatu to yiya ya ba-dollar, ya lutangu ya bankisi. Mpe yandi zabaka munu ve. Mpe bakala yango. . . Mu kwendaka na yandi. Mu zabaka yandi ve. Mpe yandi vwandaka tinda kaka yawu kuna, na mutindu nyonso, yandi mangaka ve na kutinda yawu. Mpe mu tubaka, “Mu ke defa nge.” Mpe mu tubaka. . . Mu banza, Swaniger ve. . . Ya vwandaka Tata Mason na nsongi ya Bala-bala ya Court mpe ya Spring.

Mpe mu tubaka, “Mu ke defa nge. Mpe mu kele—mu kele kaka ya kulemba mingi, kasi mu ke na kumeka na kukwenda na kisalu. Ntangu yayi, kana mu lenda ve kufuta nge. . .” Mu vwanda me kuma kaka Muklisto. Mu tubaka, “Kima ya ntete, Tata Mason, mutindu lutumu ya munu na Nzambi, mu ke defa Yandi kikunku ya munu ya kumi. Mu zola kufuta Yandi kikunku ya munu ya kumi, na ntete.” Mpe mu tubaka, “Na manima lutumu ya munu yankaka kele kufuta bamfuka ya munu.” Mu tubaka, “Tata ya munu kele ntangu nyonso ya kubela, mpe yandi. . . Mpe beto kele. . . Ya kele na bana kumi na dibuta ya beto.” Kasi mu tubaka, “Mu ke. . . Kana mu lenda futa beno ve kulutula makumi zole na tanu ya ba-cents na zulu ya lutangu ya mbongo yina, na konso kilumbu ya mfutulu; kana mu lendaka mpe ve kufuta nge ba-cents makumi zole na tanu, mu ke kwiza mpe ke tuba na nge yawu. Mu ke tuba na nge, ‘Mu—mu—mu lenda ve kusala yawu na ntangu yayi.’” Ntangu yayi, na lusalusu ya Nzambi, mu futaka nyonso. Beno me mona? Kasi ya kele yina mu zola tuba, beno me mona? Kaka muntu ve ke tuba. . .

<sup>14</sup> Oh, Muklisto mosi awa na dibuundu kilumbu mosi kwendaka mpe salisaka kisalu mosi na ditoma awa, mpe muntu yina kwizaka. . . Muntu yina tubaka, “Mu ke futa nge. Mu ke kuzwaka lufutu na Sabala,” to kima ya mutindu yina. Mpe yandi futaka yandi ata mbala mosi ve. Mpe basabala na manima ya basabala kulutaka, mpe yandi futaka yandi ata mbala mosi ve, yandi tubaka ata dyambu ve. Mpe—mpe muntu yina kwizaka mpe yufulaka munu, yandi tubaka. . . Beno me mona, yina ke bebisaka nkumbu ya dibuundu. Yina ke bebisaka nkumbu ya Klisto.

Kana beno lenda ve kufuta yandi, beno kwenda tuba na yandi, beno tuba, “Mu ke na kundefaka nge, mpe mu ke futa nge. Mu kele Muklisto, kasi mu—mu kele kaka. . . Mu lenda kaka ve kusala yawu na ntangu yayi, mu kele na. . . Mu ke na kundefaka yayi.” Mpe, beno bambuka moyo, ya kele na zulu ya babuku ya Nzambi mpe, beno zaba, mfuka yina. Ya kele samu na yina. . . Mu ke na kumeka, samu na munu mosi mpe samu na beto nyonso kintwadi, na kumeka na kuvwanda ya kukubama, samu ti beto zaba beto ke na kubelamaka pene-pene ya kima mosi, kieleka pene-pene ya kima ke salama. Na yawu beto zola kukubama. Na yina Nkwizulu ya Mfumu ke na kubelamaka mingi ntangu yayi, beto zola kukubama samu na ngunga yina ya nene.

<sup>15</sup> Ntangu yayi beto zola kukubama mpe kuzonzila ntangu yayi na mwa dilongi mosi awa yina mu me soola samu na suka yayi, na nzila ya lusalusu ya Mfumu. Mpe beto ke zonzila kaka na bunkufi mutindu beto lendaka, samu na bantu yina ke na kulandaka na alo-alo. Mu banza ti beno nyonso kele. . . beno nyonso na bisika nyonso na yinsi, kele na suka mosi ya mbote mutindu beto ke na yawu awa na Indiana. Beto ntangu yayi kele na klima ya mbote, ya madidi, tuka kunoka ya mvula. Mpe ya kele kieleka mbote.

<sup>16</sup> Ntangu yayi mu zola kutanga na Buku ya Hébreux, kapu ya 1te; mpe na Buku ya Santu Jean, kapu ya 1te. Hébreux 1:1 tii na 3, mpe Santu Jean 1:1, samu na dilongi. Dilongi ya munu na suka yayi kele kulonguka ya Masonuku. Ntangu yayi beto tanga Hébreux 1:1.

*Nzambi, yina na bambala mingi. . . mitindu mingi kuzonzaka na bantangu ya ntama na batata na nzila ya baprofete,*

*Kasi na bilumbu ya nsuka yayi me zonza na beto na nzila ya Mwana ya yandi, yina yandi me tula kibiyadi ya bima nyonso, na nzila ya yandi mpe yandi salaka yinza;*

*Yandi na kuvwandaka nsemo ya nkembo ya yandi, mpe. . . kizizi ke lakisa bumuntu ya yandi, mpe ke simbidila bima nyonso na ndinga ya ngolo ya yandi, ntangu yandi na nzila ya yandi mosi vedisaka masumu ya beto, kwendaka vwanda na diboko ya kibakala ya Nkembo ya zulu;*

Wapi mutindu ya kutanga ya kitoko! Ntangu yayi Santu Jean 1:1.

*Na mbandukulu vwandaka Ndinga, mpe Ndinga vwandaka na Nzambi, mpe Ndinga vwandaka Nzambi.*

<sup>17</sup> Ntangu yayi, mpe dilongi ya munu na suka yayi kele: *Klisto Me Monisama Na Kati Ya Ndinga ya Yandi Mosi*. Ntangu yayi, kisika mu me kuma na nsuka ya kuzonzila na yayi, vwandaka samu ti. . . Na kuzabaka ti yina beto ke tuba beto fwana tuba kaka ve samu ti beto kele ya kuvukana kintwadi samu na kuzonza kaka kima na mutindu yina, kasi ya kele kima yina ke sadisa na kuvwandisa bantu, samu ti beto ke lutila na bamaza ya boma, ya luvunu. Beto ke na kuzyeta yimeni na nzila ya yawu. Mpe bantangu yankaka mu ke banza ti ya kele na beno mutindu ya kele na munu, ya ke monanaka mutindu yina, na yawu mingi ya yawu, ya kele kaka boma.

<sup>18</sup> Mu vwandaka solula kaka na ntwenya mosi ya mulongi na kento ya yandi, na kivinga, kaka mwa ntangu fyoti me luta. Mpe bawu zole kele kaka na boma mutindu bantu nyonso yankaka ya yinza, mutindu bantu nyonso yankaka ya moyo na zulu ya ntoto. Mu tubaka, “Beno bambuka moyo, Satana kele na dikofi ya kubula beno.” Yandi ke kipe ve nani beno kele, Nzambi. . .

Yandi kele na muswa ya dikofi mosi yina. Na wapi mutindu beno zola ya vwanda, dikofi yina; beno vwanda mpofo, to kuvwanda ya kukanga na kiti na arthritique, to beno vwanda na boma? Beno me mona? Yandi kele na kisika yandi lenda bula beno. Yandi kele na muswa na kisika ya mwasi yina. Ntangu yayi, ya kele kisika yina beno fwana bumba ya kufuka ntangu nyonso. Mpe kumona nsungi ya boma yayi na kati ya yina beto ke na kuzingila!

<sup>19</sup> Mpe babande ya sabala me luta, mu banza, ke lakisa beno bima ya kulutila boma yina beto ke zonzila mosi ya bilumbu yayi ntangu beto ke lenda kuzwa kisika ya kulunga, na kuzibuka ya bampasi ya nsuka yina ba ke mwangisa na zulu ya ntoto, Bambangungu yina, mu zola tuba, na mwangusulu ya Bambangungu, mpe Bidumu Sambwadi, mpe bimpa yina ya boma yina ke na kwisa na zulu ya ntoto. Muntu ntangu yayi, mpe bantu bubu yayi, kele na kati ya mutindu mosi ya boma; yinza ya muvimba!

<sup>20</sup> Beno tanga *Reader's Digest* ya ngonda me luta, beno ke tala dyambu yango kuna; ya kele na zulu ya Billy Graham, evangeliste ya nene. Yandi kumaka ya kulemba mingi yandi vwanda lenda kaka ve kusimba balukutakanu ya yandi, mpe yandi—yandi kwendaka na dispensele ya Mayo samu na kutala nzutu. Ya vwandaka ve na kima ya yimbi na yandi, kasi ti yandi ke salaka kaka ve kisalu mingi. Mpe ba me kotisa yandi na kukima mbangu; ngalasisa ya nzutu. Yandi ke kimaka mbangu mile mosi konso kilumbu.

Mpe na manima zulunale me landila na kutuba ti science me siamisa yawu bubu yayi, ti bantwenya ya bana, mwa bana ya babakala mpe ya bakento yayi, “ke kuma na kati-kati ya bamvula ya bawu na bamvula makumi zole.” Mpe na bamvula makumi zole na tanu, bambala mingi, na mambu mingi, bana ya bakento ke kotaka na menopoze, na bamvula makumi zole na tanu.

Mu zaba ve kana beno zabaka yawu to ve, kasi mwa bankokila fyoti me luta ntangu Mpeve-Santu vwandaka zonza awa na lukutakanu, ntwenya mosi ya kento ya kuvwanda awa, ya kele kieleka yina vwandaka tambula ve mbote na mwana yina ntangu Yandi bokilaka. Mu talaka yandi mbala ya zole, mu talaka dyaka, mpe mu monaka yina vwandaka dyambu. Mu banzaka, “Ya lenda vwanda ve; mwana yina kele mingi ntwenya.” Kasi ya vwandaka menopoze, na bamvula pene makumi zole, to bamvula makumi zole na tatu, kima mutindu yina. Beno me mona?

<sup>21</sup> Mama ya munu mpe mama ya beno lutilaka na mvula yina na kutala na kati ya bamvula makumi yiya na tanu na makumi tanu. Kento ya munu lutilaka na mvula yina na kutala na bamvula makumi tatu na tanu. Ntangu yayi ya me kulumuka na bamvula makumi zole. Dikanda nyonso ya bantu me bola. Mbote, kana

banzutu yango ya beto ke na kubeba mutindu yina ya kele samu na kudyaka madia ba me vukisa, samu na batensyo, yawu yina ke bebisa yawu, yina mpe ke bebisa ve ba-cellule ya ditonzo? Kuna beto lenda mona na yinki bakento lenda vwanda na bala-bala, kinkonga. Beto lenda mona na yinki bawu lenda nata ditoma mbangu na bakilometele bankama zole na ngunga mosi na babala-bala, bima nyonso yayi. Ya me kuma na kisika ti yinsi ya muvimba, yinza ya muvimba, kaka yinsi yayi ve, kasi bisika nyonso, mabanza nyonso me beba.

<sup>22</sup> Mpe kuna ntangu beto ke zibula bima yina, kana Mfumu kuzola, na zulu ya Bambungu Sambwadi yayi mpe beto kotalisa bima yina ya boma. Na manima ya mwa ntangu, bantu ke kuma mingi bilawu, tii bawu ke banza ti bawu ke na kumona ba-fourmi ya ntela ya mongo. Ya ke kwamisa bakento; makonko ya bansuki ya yinda, ke kwiza na zulu ya ntoto, samu na kukwamisa bakento yina ke zenga bansuki ya bawu; ba ke vwanda na bansuki mutindu ya bakento, ya kubwa; mpe meno ya yinda, mutindu nkosi; bantunga na mukila ya bawu, mutindu ya kinkala-nseke, mpe—mpe nyonso yina, samu na kukwamisa bantu na zulu ya ntoto. Kasi kuna ntangu ke vwanda me luta mingi samu na kusala kima mosi samu na yawu. Beno sungama ntangu yayi. Beno me mona? Ke kwamisa!

<sup>23</sup> Mpe Lumingu me luta ntangu beto vwandaka kota na bitezo yina, na yina me tala ba-sense tanu na lweka ya ngaanda. Yina kele mwelo ya nkotolo, ba-sense tanu ya nzutu. Ya kele kaka na mutindu mosi yina beno lenda kota na kati ya nzutu, yina kele na nzila ya ba-sense yango tanu: kumona, kuwa na yinwa, kusimba, kuwa nsunga, mpe kuwa. Ya kele na mutindu yankaka ve na kuvukana na nzutu.

<sup>24</sup> Na kati ya muntu yina ya kele na muntu ba ke bokilaka mpeve, mpe yandi kele na ba-sense tanu: kubanza, mabanza . . . mpe mabanza, mpe zola, mpe konsiansi, mpe nyonso yina. Mbote mingi.

<sup>25</sup> Ntangu yayi, beno lenda banza ve na nzutu ya beno. Beno ke banza na dibanza ya beno. Mpe na kati kuna kele kisika, Baklisto mingi, ke sukaka kaka. Mpe bawu lenda, kaka mutindu blé na kati ya bilanga mpe dititi ya yimbi na kati ya bilanga, ba lenda vwanda ya kupakula na Mpeve-Santu mosi yina mukwikidi ya kieleka me kupakulama.

Kasi kuna na kati ya yawu, na kitezo yina ke landa, kitezo ya tatu, ya kele moyo; mpe yina kele yina ba soolaka ntete na Nzambi. Ya kele kisika nkuna ya kieleka kele, ya kele na kati kuna.

<sup>26</sup> Mpe, beno bambuka moyo, kana mu baka dititi ya yimbi mpe kuzibula yawu na mbele, kunamika yawu ntima ya—ya blé mpe kutula yawu kuna, kuzika yawu, ya ke basisa blé na dititi ya yimbi; ata yina ngaanda kele, yina ba-emosyo kele.

<sup>27</sup> Bubu yayi, poto-poto kele mingi na yina me tala kimbangi ya Mpeve-Santu, mpe nyonso yina. Satana lenda landa mutindu nyonso ya dikabu yina kele na Nzambi, kasi yandi lenda nata Ndinga yina ve, Ndinga na Ndinga. Ya kele kisika yina yandi kubwaka na nsaba ya Eden. Ya kele kisika yina yandi ke kubwaka ntangu nyonso. Ya kele kisika bawu, bande na zulu ya “bantu ya kupakula, ya luvunu,” to bantu ya kupakula; ba lenda vwanda ya kupakula na Kimpeve, ke zonga na bandinga, ke bina, ke boka, ke longi Nsangu ya mbote, mpe dyaka kuvwanda dyabulu.

Ya kele kati! Ntangu yayi beno bambuka moyo, Yesu tubaka, “Bayina nyonso Tata me pesa Munu ke kwiza na Munu. Muntu ve lenda kwiza kana Tata ya Munu kubenda yandi ntete.”

Ntangu yayi, beto lutilaka na dilongi yayi, samu na kulakisa ti na . . . Beno vwandaka na nkooko ya nkooko ya nkooko ya nkooko ya beno, nzila nyonso na manima, na nzonzolo ya kimuntu. Na yina, ya kele yina beno kele na nzutu ya kimuntu, na nsuni. Bantangu yankaka mwana ke butuka na dibuta mosi, na bansuki ya mbwaki. Ya ke yitukisa tata, samu ti ya kele ve na muntu yandi zabaka, na bantu ya yandi, to na lweka ya mama ya yandi, yina vwandaka na bansuki ya mbwaki. Kasi kana beno vutuka bansungi mingi na manima, beno ke tala ti ya vwandaka na muntu vwandaka na bansuki ya mbwaki. Nkuna yina ke landila na kukulumuka, mpe beno ke kwiza na nkadulu ya muntu ya ntama.

Mutindu Hebreux kapu 7 ke tuba, ti, “Melekisedeki, Abraham futaka bikunku ya kumi na Yandi ntangu yandi vwandaka vutuka na bamvita yina yandi nungaka bantinu. Mpe Levi, yina kuzwaka bikunku ya kumi, futaka bikunku ya kumi,” samu ti yandi vwandaka na kati ya menga ya Melekisedeki na . . . to, “na menga ya Abraham,” mu zolaka tuba, ntangu yandi kutanaka na Melekisedeki.

<sup>28</sup> Ntangu yayi yayi kele kima mosi. Kana beno kele mwana ya Nzambi, mpe kana mu kele mwana ya bakala ya Nzambi, to mwana ya kento ya Nzambi, beto vwandaka na kati ya Nzambi na mbandukulu. Mpe ntangu Yesu kumaka muvimba ya Ndinga, na yina beto vwandaka na kati ya Yandi, na mutindu ya nkuna. Ntangu ba komaka Yandi na kulunsi, beto kukomamaka na kati ya nzutu ya Yandi. Ntangu Yandi vumbukaka na lufwa, beto vumbukaka na Yandi. Mpe ntangu yayi, tuka beto me bakula yawu, “ntangu yayi beto kele ya kuvwanda kintwadi na Yandi, na bisika ya Mazulu na kati ya Klisto Yesu.” Beno me mona? Samu Yandi . . . Beto, kana beto kele bana ya babakala mpe bana ya bakento ya Nzambi, beto kele bana ya Nzambi, na yina beto kele binama ya Nzambi. Na yina beto vwandaka . . . kele na Luzingu ya Seko. Mpe Nzambi kele kaka Luzingu ya Seko yina kele. Na yina, beto vwandaka na kati ya Yandi kubanda mbandukulu. Mpe ntangu Yesu kumaka Ndinga yina nyonso, na



yina beto vwandaka kitini ya Yandi na ntangu yina. Amen! Yawu yina. Mbala mosi na kati kuna, ya kele na ata mpeve ya yimbi, ata bangolo, ata kima mosi ve lenda ningisa yawu. Ya kele kisika ya kukangama ya moyo.

<sup>29</sup> Beno lendaka vwanda ya kupakula na kati *awa*, na mpeve yayi, mpe kuzola, mpe kusala bima nyonso yayi yankaka. Kasi ntangu ya ke kumaka na kisika yayi ya kukangama na Ndinga yayi, ata mbala mosi ve ti beno ke katuka kuna. Ya ke kangama mbote mpe kieleka, na Ndinga yina, mutindu ya lendaka vwanda. Na ngaanda ya yawu, ata nyonso yina beno ke sala, beno kele dyaka ya kuzimbana.

<sup>30</sup> Nsungi yina ya Dibuundu ya Laodicée, “kinkonga, mpofu, muntu ya mpasi; mpe zaba yawu ve.” Beno me mona, ya kele na ngaanda. . . Ya kele kupakula yina, ya kupakula na Mpeve ya kieleka. Beno me mona, Mpeve-Santu yina lenda kubwa na zulu ya muntu, na kati ya mpeve ya yandi. Kasi moyo ya yandi kele nkuna ya yandi; nkuna yango kele Ndinga. Beno me mona? Mpe wapi mutindu. . . Mu ke kipe ve mutindu beno lenda longa, mutindu mbote beno ke sala *yayi*, mpe mutindu beno zolaka; yina kele mosi ya bankotolo na mpeve. Beno lenda kuzola ve na nzutu ya beno; beno ke zola na mpeve ya beno. Yina kele mosi ya bankotolo. Mpe beno lendaka zola, mpe kuzola Nzambi, mpe dyaka kuvwanda ya kusungama ve. Beno lendaka basisa bampeve ya yimbi, mpe kulonga, mpe kusala mambu yayi; dyaka kuvwanda ya kusungama ve. Yesu tubaka yawu, tubaka ti bantu mingi ke kwiza na kilumbu yina. Ndinga yina ke sukisa dyambu!

*Na mbandukulu vwandaka Ndinga, mpe Ndinga vwandaka na Nzambi, mpe Ndinga vwandaka Nzambi.*

*Mpe Ndinga kumaka nsuni, mpe zingaka na kati-kati ya beto, . . .*

<sup>31</sup> Beno tala, mu ke zonzila na dilongi yayi ya Biblia, na, *Klisto Me Monisama Na Kati Ya Ndinga ya Yandi Mosi*. Kisika mu me kuzwa nsuka yayi, ya vwandaka na bilo ya munu.

Muntu mosi ya luzolo, yandi lendaka vwanda ya kuvwanda awa na suka yayi. . . Mu kele na foto ya kulelika na kati ya bilo ya munu kuna, ya kele foto ya *Yintu ya Klisto* ya Hofmann, yina ba tulaka na Bakyese. Mpe kaka na kukuma na kisika ba tulaka bansuki, ba byetaka mwa mingi na kilapi ntangu beno ke kuma na kisika yina. Kuna, beno tala Yandi kele, ya kuvwanda na kati ya Ndinga ya Yandi, ke na kutalaka; Klisto na kati ya Bakyese. Ya kele na muntu, ata nani yandi kele, mu ke tonda nge samu na yawu.

Mpe muntu yankaka nataka foto yina ya Elie ke na kumata na kipusu ya tiya, mpe tulaka yawu na bilo ya munu kuna. Beto ke sepela mingi na bima yayi. Bambala mingi, samu na bantu mingi, mu ke kuzwaka kaka ve ntangu ya mbote ya kuzonzila

mpe kutuba bima yayi, kasi mu ke monaka yawu, mpangi, mpangi ya kento. Mu—mu zaba yawu, mpe Nzambi zaba yawu.

<sup>32</sup> Ntangu yayi mu ke zonzila na dilongi yayi: *Klisto Me Monisama Na Kati Ya Ndinga ya Yandi Mosi*. Beno tala, na kati ya Bakyese, kuna me telama foto ya Klisto, ya kutelama kaka kuna, mutindu. Ya kele kisika mu banzaka na dilongi yayi. Ntangu yayi, Klisto na Ndinga kele mosi. Beno me mona?

<sup>33</sup> Ba ke tuba, “Wapi mutindu Biblia vwandaka . . .?” Bantu ke tubaka. Mu vwandaka tumbula na muntu mosi na ditoma ntama mingi ve. Yandi tubaka, “Banza na yawu. Beto kele awa na zulu ya ntoto yayi, mutindu beto kele, mpe beto zaba kaka to lenda tuba kaka ti beto kele ya kuvuuka na nzila ya disolo ya Bazwife yina ba ke bokilaka Biblia.”

<sup>34</sup> Mu tubaka, “Tata, mu zaba ve wapi mutindu nge lenda tuba mutindu yina, kasi mu ke kwikila ve ti ya kele disolo ya Bazwife,” mu tubaka.

Yandi tubaka, “Mbote, nge ke sambilaka, nani nge ke sambilaka? Mu lombaka *yayi-mpe-yayi* mpe mwa bima; mu kuzwaka yawu ve.”

<sup>35</sup> Mu tubaka, “Nge ke sambilaka yimbi. Beto fwana ata mbala mosi ve kusambila samu na kusoba mabanza ya Nzambi; beto fwana sambila samu na kusoba mabanza ya beto. Mabanza ya Nzambi kele na nsatu ya kusoba ve. Nge me mona? Nge me mona, ya kele kieleka.” Mu tubaka, “Ve samu na yina beno ke na kusambilaka . . .”

Mu zaba mwana mosi ya ntwenya ya bakala ya Katolika, na ntangu mosi, yandi vwandaka na buku ya bisambu, yandi vwanda tangaka bisambu, mpe samu mama ya yandi kuzinga. Mpe mama kufwaka, mpe yandi losaka buku ya bisambu na tiya. Mbote, beno me mona, mu ke sadilaka ve buku ya bisambu; kasi, na mutindu nyonso, beno me mona, beno ke bakaka nkadulu ya yimbi. Beno ke mekaka na kutuba na Nzambi yinki ya kusala.

Kisambu zolaka vwanda, “Mfumumu, soba munu na kulunga na Ndinga ya Nge.” Ve, “Soba,” ve, “bika mu soba mabanza ya Nge. Nge soba mabanza ya munu.” Beno me mona? “Nge sobisa mabanza ya munu na luzolo ya Nge. Mpe luzolo ya Nge kele ya kusonika awa na Buku. Mpe, Mfumumu, kubika ve—kubika ve ti mu kwenda tii Nge ke kuzwa mabanza ya munu—ya munu ya kutula kaka mutindu mabanza ya Nge. Mpe kuna ntangu mabanza ya munu ke vwanda mutindu mosi na mabanza ya Nge, na yina mu ke kwikila konso Ndinga ya Nge ya kusonika. Mpe Nge tubaka, na kati kuna, Nge ke sala ‘mambu nyonso kutambula kintwadi samu na mbote’ ya bayina ke zolaka Nge. Mpe mu zola Nge, Mfumumu. Nyonso ke na kutambula kintwadi samu na mbote.”

<sup>36</sup> Mu me vwanda sabala yayi na bwala, na bankundi mosi ya luzolo mingi. Mu yufulaka mosi ya bawu na mesa, mazono, na yina beto vwanda kudya. Beto ke vwandaka ntangu nyonso na

ziunga mpe ke salaka mwa. . . mutindu ya mwa kulonguka ya Biblia. Beto vwandaka zonzila na zola.

Mpe ya vwandaka na muntu mosi yina tubaka na munu, yandi tubaka, “Mu banza ti nge kele mbeni ya Klisto.”

<sup>37</sup> Mu tubaka, “Kana yina ke sepelisa Mfumu ya munu, ya kele yina mu ke zola kuvwanda. Mu ke zola kuvwanda nyonso yina Yandi ke zola ti mu vwanda. Mu zola Yandi. Mpe kana Yandi lendaka losa munu na difelo, mu ke landila na kuzola Yandi, kana mu kwenda na mpeve mosi yina kele na munu ntangu yayi.” Yandi talaka munu mutindu ya ngitukulu.

Mu monaka yiya to tanu ya bawu kuna, bantwenya ya babakala; ntwenya ya bakento, bakento ya mbote. Mu zabaka mutindu bana ya babakala yango vwanda zolaka bakento ya bawu, na yawu mu tubaka na bawu, mu tubaka, “Beno tala mutindu ya kumeka yawu. Kana kento ya beno, ntete beno kwelana. . . Ntangu yayi, beno vutuka na manima, beto tuba beno. . . luzingu na makwela yayi, beno vwanda lota ti beno vwandaka ya kukwelana; ti beno vwandaka ve ya kukwelana, kasi beno lotaka ti beno vwandaka. Mpe ti beno me vumbuka, mpe beno me kwenda mpe me zonzila yawu na nkundi ya beno ya kento, mpe kutuba, ‘Nge zaba, mu me lota ti beto me kwelana, mpe ti beto vwandaka na bana. Beto vwanda zinga na kyese, mpe—mpe vwandaka vingila na Nkwizulu ya Mfumu, mpe nyonso yina.’ Mpe kuna mwana ya kento yayi ke tuba na beno, ‘Nge zaba, mu ke zolaka bakala yankaka kulutula mu ke zolaka nge. Mu ke vwanda na kyese mingi na bakala yankaka yina.’ Beno lendaka, na ntima ya beno, kuzola yandi mingi na kutuba, ‘Balusakumunu ya Nzambi kuvwanda na zulu ya nge, nkundi ya munu ya luzolo. Kwenda na bakala yayi yankaka?’”

Mbote, ntangu yayi beno tala yawu, beno nyonso babakala to beno bakento. Beno me mona? Mbote, kana luzolo ya beno kele ya kulunga, beno ke sala yawu, samu ti beno zola bumbote ya yandi. Na yina, beno zaba ti beno lenda kuzwa yandi, beno lenda zinga na yandi, beno. . . Yandi kele kento ya beno; yandi ke vwanda. Yandi ke kwelana na beno, kasi yandi ke vwanda na kyese ve. Yandi ke vwanda na kyese mingi. . . Mpe na yina, kana beno zola yandi, kuna beno ke zola yandi kuvwanda na kyese.

Na yawu, ata nyonso yina luzolo ya Nzambi kele, bika ti luzolo ya Nzambi kusalama, ata ti mu ke sepela na yawu to ve. Mu zola kuzinga samu Yandi sepela na yina mu ke sala. Na yawu beno tala kikuma ya beno—ya beno mpe mitifi ya beno na nzila ya yawu; beno ke zaba kana beno ke zolaka Nzambi to ve.

Yinki kana Yandi tuba, “Nge sadila Munu kana Mu ke losa nge?”

“Mu zola Nge, na mutindu nyonso.”

<sup>38</sup> Na yawu, kana mabuundu lendaka mona yawu mpe lendaka kwikila yawu na mutindu yina, ya zolaka vwanda ve na mosi

ke meka na kubaka balo na muntu yankaka na yina yandi ke na kukimaka na yawu. Yandi zolaka kengila yandi. Beno me mona? Kana, mitifi ya kieleka mpe kikuma ya kieleka vwandaka, muntu mosi ve ke meka na kutuba, “Hé, mu me kuzwa *yayi* mpe! Mu, *yayi* kele ya munu, *yayi*.” Beno me mona, Nzambi lenda sadila muntu ve. Ya kele na bilanda-landa mingi yina ke landa yawu, mpe yina kele Satana. Mpe bantu lenda bakula yawu ve. Bawu ke meka na kubaka balo na muntu yina ya me pesama yawu. Bika ti Nzambi kutelemisa ministele mosi mpe beno tala bantu yikwa ke landa yawu. Beno me mona? Beno me mona?

<sup>39</sup> Ntangu yayi, zola ya kieleka samu na Nzambi, “Ata yina mu ke sala, Mfumu, kana mu lenda tuba kaka ndinga mosi samu na Yawu, sadisa na kukeba Yawu, bika mu sala yawu.” Beno me mona?

Ya kele kima mosi ke vwanda samu na kento ya beno. Kana ya kieleka beno zola yandi, beno me mona, ya kele ve—ya kele ve luzolo ya *phileo*; ya kele luzolo ya *Agapao*, luzolo ya kieleka. Yandi lendaka zinga na muntu yankaka, na kyese mingi; beno me kwelana ve ntangu yayi, ya kieleka, beno lenda ve.

<sup>40</sup> Mpe, na nzila mosi, samu na bantu ke kuwaka ba-bande yayi. Bantu, mingi, ke fidisaka, na kutubaka, “Kasi, na *Makwela Mpe Kufwa Makwela*, nge tubaka *yayi* mpe nge tubaka *yina*.” Mu ke tubaka yawu bambala mingi; babande yayi kele kaka . . . Mu ke zonzaka na dibuundu ya munu, mpangi. Mu kele na kizitu ve na yina Nzambi ke pesaka beno na kudikisa; mu kele na kizitu na mutindu ya Madya mu ke dikisa bantu yayi. Yayi kele kaka samu na tabernacle yayi. Beno me mona? Ntangu yayi, kana bantu zola kuwa babande, yina me tala bawu. Kasi mu ke na kuzonza na yina Nzambi me pesa munu. Ya vwandaka masumu ya bawu yina ba zimbanaka.

Muntu mosi sonikaka, mpe tubaka, “Mbote, mu salaka *yayi* mpe mu salaka *yina*. Nge tubaka ti disumu ya beto . . .” Mu—mu tubaka yawu ve.

Mu tubaka, “Bakula yawu mbote; yayi kele kaka samu na bantu yayi awa, bantu yina kele awa na tabernacle, mameme ya munu mosi.” Ntangu yayi, kana bantu zola kuvukisa madya mpe nyonso yina kuna, beno—beno ke kuzwaka luzayikisu na Nzambi mpe ke sala yina Nzambi ke tuba na beno na kusala. Mu ke sala kima mutindu mosi. Kasi Bansangu yayi kele samu na dibuundu yayi.

<sup>41</sup> Beno tala ntangu yayi, beto vutuka manima, beto fwana kuzwa kima yankaka na yina beto fwana kangama. Kima fwana vwanda kisika ya kukangama, na nzonzolo yankaka, ya kele kima ya nsuka. Mpe muntu nyonso fwana kuzwa kima ya nsuka to dikunzi. Mu longaka yawu mbala mosi, bamvula me luta, na zulu ya dikunzi, kisika yina kele ndinga ya nsuka.

42 Mutindu muzonzi na nsaka ya balo, kana yandi tuba ti ya kele touche, ya kele kaka kieleka yina ya kele. Ata mutindu beno me mona yawu, muzonzi me tuba ya kele touche. Beno ke tuba, “Mu—mu—mu. . . Ya vwanaka ve touche. Ya me luta. . . Mu me mona. . .” Ata nyonso yina ya kele, ntangu yandi ke tuba, “touched,” ya kele kaka yina, yina ke sukisa kaka yawu. Yandi, yandi kele kima ya nsuka.

43 Mpe Minda ya mbwaki kele kima ya nsuka, kana ya tuba, “kwenda.” Beno ke tuba, “Kasi, mu, mu kele na kati ya mbangu, mu fwana. . .” Ve, ve. Ya ke tuba, “Beno vingila na yina bantu yankaka ke na kuluta.” Beno me mona? Ya kele kima ya nsuka.

44 Ntangu yayi, ya fwana vwanda na kima ya nsuka na nyonso beno ke sala. Ya zolaka vwanda na kima ya nsuka ntangu beno soolaka kento ya beno. Ya zolaka vwanda na kento yina beno zolaka soola.

45 Ntangu yayi, ya fwana vwanda na ntangu mosi kisika, ntangu beno ke sumba ditoma, ya fwana vwanda na kima ya nsuka beno ke sala samu na kusoola. Ya ke vwanda Ford, Chevy, Plymouth, ditoma ya yinsi yankaka, nyonso yina ya kele, beno fwana vwanda na kima ya nsuka.

Mpe mutindu mosi ya kele na luzingu ya Buklisto. Ya fwana vwanda na kima ya nsuka.

46 Ntangu yayi, kana muntu mosi kutuba, yandi kukwenda na muntu yankaka mpe kutuba. . . kana yandi kuwaka muntu kutuba, “Mbote, nge fwana botama,” mpe muntu yayi ata mbala mosi ve. . . Ya lendaka vwanda ti, yandi kele, ya dibuundu mosi yina ke botikaka ve, bawu ke mwangisaka kaka mwa maza. Mu banza, beto baka mutindu, ba-Methodiste, ba ke botikaka kana ba me lombwa, mutindu mu kuwaka. To mu banza. . . Muntu ya Katolika, mu banza ti bawu ke mwangisaka kaka mwa maza. Na yawu kuna kana—kana muntu kuwaka kima na zulu ya “kukota na maza,” mbote, ti yandi bakulaka yawu ve; ba kulisaka yandi na malongi ya Katolika. Na yawu yandi ke kwenda na nganga-Nzambi, mpe ke tuba, “Tata, mu me kuwa ti beto fwana botama na kukotaka na kati ya maza. Yinki dibuundu ya beto ke tuba samu na yawu?”

47 “Mbote, ya ke tuba ti—ti beto fwana mwangisa mwa maza.” Kana dibuundu yina kele kima ya yandi ya nsuka, yina ke sukisa dyambu. Kunwana nyonso ke suka; dibuundu me tuba yawu, mpe yimeni.

48 Yinki kana. . . kana mpangi ya Baptiste kuwaka beto kutuba ti beto ke kwikilaka na mbotokolo na “kukotaka na maza?” Yandi ke tuba, “Mu ke kwikilaka yawu.”

“Mpe na Nkumbu ya ‘Yesu Klisto.’”

Ntangu yayi, mambele yayi—yayi ya dibuundu ke vutuka na pasteur mpe ke tuba, “Pasteur, mu me kuwa muntu kutuba na

munu ti beto fwana botama na kukotaka na kati ya maza, mbote mingi, kasi na Nkumbu ya ‘Yesu Klisto.’”

<sup>49</sup> “Mbote,” yandi ke tuba, “ntangu yayi, beto mona. Kasi, awa buku ke tuba ti beto fwana botama na kusadilaka ‘Tata, Mwana, Mpeve-Santu.’” Kana dibuundu yina kele kima ya nsuka, yina ke sukisa dyambu. Yandi ke tala ve yina kima yankaka ke tuba; yina kele kima ya yandi ya nsuka.

<sup>50</sup> Mbote, konso denomination kele kima ya nsuka samu na bakwikidi ya bawu.

Kasi, samu na munu, mpe samu na bayina mu ke na kivuvu ti mu ke na kutwadisa na Klisto, mpe na nzila ya Klisto, Biblia kele kima ya beto ya nsuka. Ata yina . . . Samu ti, Nzambi tubaka, “Ti konso ndinga ya muntu kuvwanda luvunu, mpe ya Munu Kieleka.” Mpe mu ke kwikila ti Biblia kele kima ya nsuka ya Nzambi. Ata nyonso yina muntu yankaka ke tuba; Ya kele kima ya nsuka.

Biblia kele ve buku ya basysiteme. Ve, tata. Ya kele ve buku ya basysiteme, to kode ya bankadulu. Biblia kele ve buku ya basysiteme, ya basysiteme mingi, mpe nyonso yina. Ve, tata. Ya kele ve buku ya bankadulu. Ve, tata. Ya kele ve. To Yawu kele buku ya disolo, na mutindu nyonso. To, dyaka Yawu kele buku ya théologie. Samu ti, Yawu kele luzayikisu ya Yesu Klisto.

Ntangu yayi kana beno zola kutanga yawu, beno bayina kele na mikanda ya beno, beno sonika yawu, ya kele Apocalypse 11:1 na 3, ti, Biblia kele “Luzayikisu ya Yesu Klisto.”

<sup>51</sup> Beto tanga kaka yawu na yina beto kele na ntangu. Mu banza ti ya munu . . . mu ke na banoti mingi ve awa samu na kuzonzila. Kana Mfumu vutula bilumbu na kukwiza, na yina, beto ke meka na kubaka na yawu.

*Luzayikisu ya Yesu Klisto, yina Nzambi pesaka na yandi, samu na kulakisa na bisadi ya yandi bima yina fivana salama na ntangu fyoti; mpe yandi fidisaka mpe lakisaka yawu na nzila ya wanzio ya yandi na kisadi ya yandi Jean:*

*Yandi yina pesaka kimbangi ya dyambu ya Nzambi, mpe . . . kimbangi ya Yesu Klisto, mpe ya bima nyonso yina yandi monaka.*

*Kyese na yandi yina ke tanga, mpe bawu yina ke kuwa dyambu ya profesu yayi, mpe ke bumba mambu yango yina kele ya kusunama na kati kuna: samu ti ntangu me belama.*

<sup>52</sup> Na yawu, Biblia kele luzayikisu ya muvimba ya Yesu Klisto. Mpe Yawu kusunamaka na nzila ya baprofete. Hebreux 1:1, na . . . “Nzambi, Yina na bambala mingi kuzonzaka na batata na nzila ya baprofete, na kilumbu ya nsuka yayi ke na kuzonza na beto na nzila ya Mwana ya Yandi, Yesu Klisto,” yina vwandaka

baprofete, bawu nyonso, ya kutula kintwadi. Yesu vwandaka Malachie; Yesu vwandaka Jérémie, Esaie, Elie. Nyonso yina bawu vwandaka, vwandaka na kati ya Yandi. Mpe nyonso yina beno kele, mpe nyonso yina mu kele, kele na kati ya Yandi; Bandinga, bambangi ya Ndinga.

Na yawu Yawu kele ve buku ya basysiteme, kode ya bankadulu, to dyaka ti Yawu kele buku ya masolo, to buku ya théologie. Yawu kele ve. Kasi Yawu kele luzayikisu ya Yesu Klisto, kumonana ya Yandi mosi Nzambi, na Ndinga na nzutu. Yawu yina Yawu kele. Biblia kele Ndinga, mpe Nzambi kele nsuni, Nzambi na kati. . . Nzambi kele Ndinga, na kisika, mpe Yesu nzutu. Ya kele luzayikisu, mutindu Nzambi (Ndinga) kutalanaka na nzutu ya muntu, mpe monisamaka na beto. Mpe ya kele samu na yina Yandi ke kuma Mwana ya Nzambi; Yandi kele ndambu ya Nzambi. Beno me bakula? Ntangu yayi, Yandi kele ve. . . Nzutu kele ndambu ya Nzambi, na yina ti ya kele Mwana.

<sup>53</sup> Mwana, mutindu bantu ya Katolika ke tulaka yawu, “Mwana ya Seko,” mpe mabuundu nyonso yankaka; ndinga yina ke simba mpe ve. Beno me mona? Ya lenda vwanda ve na Seko, mpe na manima kuvwanda Mwana, samu ti *Mwana* kele kima “ba me buta.” Mpe mpova Seko, Yandi lenda vwanda ve ya Se- . . . Yandi lenda vwanda Mwana, kasi Yandi lenda vwanda ve Mwana ya Seko. Ve, tata. Ya lenda vwanda ve na Mwana ya Seko.

<sup>54</sup> Ntangu yayi, kasi Yandi kele Mwana, na mutindu ti, Ndinga nyonso yina vwandaka na Jérémie, na Moise, mpe Bandinga nyonso yina, mutindu Yandi tubaka, “Bawu ke tuba na Munu.” Luzayikisu nyonso yina ya Kinzambi ya kieleka ya Ndinga me vukana na kati ya nzutu mosi ya muntu, mpe Nzambi tulaka nzutu na Yawu. Ya kele samu na yina ba vwandaka bokila Yandi “Mwana,” samu Yandi kulakisa, “Tata.” Mbote, ya kele kaka mpasi ve, kana beno bika kaka Nzambi kumwangisa yawu na kati ya mabanza ya beno. Beno me mona? Nzambi me monisama na kati ya nzutu ya nsuni, beno tala, me monisama na nsuni. . . to na Ndinga na nsuni. Ya kele Santu Jean 1:14, “Mpe Ndinga kumaka nsuni, mpe zingaka na kati-kati ya beto.”

<sup>55</sup> Ntangu yayi beno tala Biblia yayi. Bantu yankaka ke tubaka, “Oh, mbote, Yawu me salaka yayi, Yawu me salaka yina.” Kasi beno bika mu tuba na beno kima mosi, beto fwana kaka. . .

Beto kota na disolo ya Biblia, mwa ntangu fyoti, beto mona kisika Yawu me katuka. Ba sonikaka Yawu na misoniki makumi yiya ya kuswaswana. Bantu makumi yiya sonikaka Biblia, na kati ya bamvula ya kuswaswana fundu mosi na bankama sambanu, mpe na bantangu ya kuswaswana, kusamunaka na ntwala mambu ya kulutila mfunu yina salamaka ntete ve na masolo ya yinza, mpe, bambala mingi, bankama ya bamvula na ntwala yawu salama. Mpe ya kele ve na kifu mosi na kati

ya Babuku makumi sambanu na sambanu ya muvimba. Oh, la la! Ata musoniki kasi Nzambi Yandi mosi zolaka vwanda ya kusungama mutindu yina. Ata Ndinga mosi ve tulaka ntembe na yankaka.

Beno bambuka moyo, funda mosi na bankama sambanu ya bamvula ya kuswaswana, ba sonikaka Biblia, kubanda Moise tii na—tii na lufwa ya—ya Jean na kisanga, to na Kisanga ya Patmos. Bamvula funda mosi na bankama sambanu, mpe kusunamaka na makumi yiya ya misoniki ya kuswaswana; mosi zabaka mpe ve mosi yankaka, mpe bawu vwandaka na Yawu ve mutindu “Ndinga.” Bayankaka na kati ya bawu monaka ata fyoti ve “Ndinga.” Kasi ntangu ba sonikaka Yawu, mpe ba bakulaka ti ya vwandaka baprofete, na manima, ntangu ba vukisaka baprofesi ya bawu kintwadi, mosi na mosi ya yawu kuvukanaka na mosi yankaka.

<sup>56</sup> Beno tala Pierre, yina samunaka na Kilumbu ya Pentecote, “Beno balula ntima, mosi na mosi ya beno, mpe beno baka mbotika na Nkumbu ya Yesu Klisto samu na lemvo ya masumu ya beno.”

Paul kuwaka ntete ve kima mosi na zulu ya Yawu. Yandi kwendaka na Arabie bamvula tatu, samu na kulunguka Ngwisani ya Ntama, samu na kumona Nani Dikunzi yayi ya Tiya vwandaka yina zonzaka na yandi na nzila, na kutubaka, “Saul, samu na yinki nge ke na kutalisa Munu mpasi?” Wapi mutindu yandi zolaka vwanda na kifu? Ata mbala mosi ve ti yandi kwendaka yufula dibuundu.

Mpe bamvula kumi na yiya na ntwala, ntangu yandi kutanaka na Pierre, bawu vwanda longaka kima mutindu mosi, Ndinga na manima ya Ndinga. Yina kele Biblia ya beto. Ti bandinga ya muntu yankaka kubwa. Na *Yayi*, muntu ve lenda bwela na Yawu. Beno lenda bwela dyaka ve na Biblia. Ve, tata. Yayi kele Luzayikisu ya muvimba. Ya kele nyonso.

<sup>57</sup> Mutindu Bidimbu Sambwadi. “Bidimbu Sambwadi,” muntu mosi vwanda landila kutuba na munu, “ntangu yayi nge ke. . . Mfumu ke tuba na beno, Mpangi Branham, ntangu Bidimbu yayi ke monisamaka, mpe ke tuba na beto wapi mutindu ya kubelama mingi na Nzambi, mpe wapi mutindu ya kusala yawu.”

<sup>58</sup> Mu tubaka, “Ve, tata, ya lenda vwanda ve. Samu ti, Biblia, Bidimbu Sambwadi na zulu ya Yawu kele na mansweki sambwadi ya kubumbama. Ba sonikaka yawu yimeni, kasi ba bakulaka ve yina Yawu vwandaka.”

Beno tala mbote mutindu bawu vwandaka saba mbote na yawu, samu na kuvwanda ya kubotika na Nkumbu ya “Yesu”; beno me mona, ya vwandaka yawu ve. Nkumbu ya “Mfumu Yesu Klisto”! Beno me mona bima nyonso yina, mutindu ya vwandaka. Samu ti, ya kele na Bayesu mingi; mu kele na bankundi mingi awa na zulu ya ntoto na nkumbu “Yesu,”



bankundi ya milongi. Ya kele yawu ve. Ya kele ya beto “Mfumu Yesu Klisto.”

Ata musoniki kasi Nzambi zolaka vwanda ya kulunga. Ntangu yayi beto tala kaka mutindu Biblia yayi kusonamaka.

<sup>59</sup> Ntangu yayi, beto baka mutindu, na . . . Yinki ke salama kana beto kwenda ntangu yayi mpe beto baka babuku makumi sambanu na sambanu ya minganga yina ke talaka dyambu ya nzutu, yina ba sonikaka na balukolo makumi yiya ya minganga, nkama mosi mpe kumi na sambanu . . . to na bamvula nkama mosi na kumi sambanu ya kuwaswana? Mu ke kumiyufula wapi mutindu ya kulandila beto ke kuzwa na nsuka?

Ntangu, George Washington, mfumu ya beto ya yinsi, pene ya bamvula nkama zole me luta, samu na pneumonie, ba katulaka yandi dinzaka ya dikulu mpe salaka yandi kubasisa menga ndambu ya litele. Yinki kana beto baka . . .

<sup>60</sup> Beto kwenda fyoti na ntuala, na mwa bima yina beto kele mingi ya kubendama bubu yayi, science. Yinki ke salama kana beto baka science makumi yiya ya kuswaswana, ya kuswaswana na bamvula funda mosi na bankama sambanu, mpe beto mona na yinki beto ke suka? Muntu mosi ya science ya France, bamvula bankama tatu me luta, siamisaka na nzila ya science, na kubalulaka balo, ti, kana ba bika kima kubaluka mingi mbangu makumi tanu ya bakilometele na ngunga mosi, kima yango ke katuka ntoto mpe ke kwenda kubwa. Beno banza ti science ke tala dyaka na yawu? Ya kele dyaka na kulandila na yawu ntangu yayi, na yina bawu ke tambula na ditoma na bala-bala, na nzila awa, bankama zole na makumi tanu mbangu na ngunga mosi? Beno me mona? Kasi siamisaka yawu na kulandilaka science ti, na ngolo ya kubalukaka mbangu balo na zulu ya ntoto, yina bakilometele makumi tanu na ngunga mosi, ti, kima nyonso ke nanguka na zulu ya ntoto mpe ke kwenda, ya ke kwenda kubwa na zulu. Ve, ya kele ve na kulandila na yawu.

<sup>61</sup> Kasi Ndinga mosi ve na kati ya Biblia ke tulaka ntembe na yankaka. Profete mosi ve kuteleminaka ntete mosi yankaka. Bawu vwandaka, bawu nyonso, ya kulunga. Mpe ntangu muntu mosi vwandaka kwisa mpe vwandaka pesa profesi, mpe profete yina ya kieleka vwandaka telema mpe vwandaka semba yandi, na yina ya vwandaka talana. Beno me mona? Beno me mona? Na yawu Biblia kele Ndinga ya Nzambi, samu na bakwikidi nyonso ya kieleka.

<sup>62</sup> Ntangu yayi, beno zolaka kuzwa ve kieleka na zulu ya yina badokotolo zolaka wisana. Beno lenda mpe ve kuzwa kieleka na bawu ntangu yayi. Beno lenda ve kuzwa kieleka na science ntangu yayi.

Ntangu yayi, beno zaba, na ntangu mosi me luta, ba vwanda tuba na beto ti . . . ti, “Ntangu Biblia ke tuba ti ‘yandi monaka Bawanzio yiya ya kutelama na bansongi yiya ya ntoto,’ ti yina

zolaka vwanda ve. Ntoto kele ya kubaluka.” Kasi Biblia ke tuba, “bansongi yiya.” Mbote, ntangu yayi beno me mona, basabala zole me luta, to basabala tatu me luta, awa, bazulunale vwandaka zonzila na dyambu yayi, ba me tala ti yinza kele kare. Bantu yikwa monaka yawu? Na yina, ya kieleka. Beno me mona? Mu me kopiye yawu nyonso, mu ke na kuvingila kaka muntu mosi kutuba kima mosi.

<sup>63</sup> Mpe ba ke tala, kilumbu mosi, ti bawu ke na kumonaka mpe ve yinda ya kitamina ya nsemo na bamvula nkama mosi mpe makumi tanu ya mafuku. Ba ke na kutambulaka na kusalaka mutindu nkongolo. Ya kele kieleka.

Beno ke bakula, mosi ya bilumbu yayi, ti ntangu beno ke kwendaka na Mazulu, beno ke kwendaka kisika yankaka ve. Beno kele kaka dyaka awa, mpe, kaka na kitezo yankaka kulutila mbangu na yayi.

Bantinta ke na kulutila kaka na nzila ya kivinga yayi. Konso ntinta, ya kinkuti, ya robe, nyonso yina beno kele ya kulwata, kele Seko, ba ke na kubakaka yawu, ya ke na kubaluka mpe ke na kubaluka na yinza. Konso ntangu beno ke bweta meso ya beno, ba ke bakaka kaka yawu. Beno tala mbote, televisyo ke siamisa yawu.

<sup>64</sup> Ntangu beno butamaka, Nzambi tulaka bande. Ya ke salaka ve. . . Yandi tulaka bande, na mwa ntangu fioti ya ke salaka ve makelele mingi, beno zaba. Yina kele mwa bébé, tii kuna ya ke kuma na ntangu ya kuyindula; kuna makelele ke banda, yandi ke banda na kutuba bima mpe kusala bima yina yandi fwana pesa mvutu. Mpe na yina ntangu luzingu yina ke suka, yina ba bakaka yina to bande yina ba ke katula yawu mpe ba ke tula yawu na kibumbulu-babuku ya nene ya Nzambi. Na yina, wapi mutindu beno ke baluka na yawu na Kiti ya Lufundusu? Ba ke bula yawu na ntwala ya beno, konso kuningana beno salaka, konso dibanza yina lutaka na dibanza ya beno. Beno lenda mona yawu? Ntangu yayi beno lenda mona kisika Nzambi. . .

<sup>65</sup> Mu vwandaka ya kutelama awa, nkokila yankaka yina, ya vwandaka na muntu mosi kwizaka na estrade, bakala mosi ya yinda, ya ngolo, ya dibandi, bakala ya kitoko mingi na kutala. Mpe yandi basikaka. . . Mfumu tubaka na yandi bima mingi na zulu ya dibute ya yandi mpe yina yandi zolaka sala. Mpe yandi basikaka mpe kwendaka vwanda. Na manima ya baminuti fyoti, awa me kwiza na ntwala ya muntu muntu yankaka mutindu yina, kasi yandi vwandaka na yintu ya yandi na yisi. Mu vwanda lenda ve kubakula, mpe mu vwanda talaka dyaka bakala yango kuna; mpe yandi. . . Ya vwandaka ve yandi, samu ti ya vwandaka kima yankaka. Mpe bakala yayi, mu vwanda lenda ve kutala yandi. Mu talaka na ziunga ya muntu, muntu ve, na manima ya muntu. Mu tubaka, “Muntu yina kele ya kuvwanda na lweka ya balele ya nela yina kuna.” Mpe ya vwandaka. . . mpangi ya beto yina ke

kwizaka na dibuundu awa, ya yinda, ya dibandi, muntu mosi ya kitoko mingi yina vwandaka ya kuvwanda kuna mutindu yina. Mpe yandi vwandaka na yintu ya yandi na ntwala, vwandaka sambila, samu yandi vwandaka kaka pene-pene na lufwa samu na mpasi ya kifundu.

Yandi zolaka kuzwa basapatu. Kento ya yandi zolaka ti yandi kuzwa basapatu ya malu-malu. Yandi tubaka, “Ve, mu kele na nsatu ve ya kuzwa yawu, samu ti mu ke zinga ve samu mu na kulwata yawu.”

Yandi vwanda kufwa. Mpe na kuvwandaka ya kuvwanda kuna, beno me mona, na kitezo yina, aleluya, Nzambi kotaka kaka kuna mpe tubaka, “Yandi yina kele ya kuvwanda,” kaka kisika yina yandi vwandaka. Beno me mona yina mu zola kutuba?

<sup>66</sup> Ntangu yayi beno tala, mpe ya kele ve na ata kifu na kati ya Masonuku. Yesu, Ndinga ya Nzambi, zaba mabanza yina kele na kati ya ntima. “Ndinga ya Nzambi kele na ngolo mingi, na meno” Hebreux 4:12. “Ndinga ya Nzambi kele na meno, ya kulutila na mbele ya meno zole, mpe mufundisi ya mabanza mpe bansatu ya dibanza.” Beno me mona? Yawu ke kulumuka mingi na dibanza, mpe ke sosa, mpe ke mona. Yinki kele *kumona*? “Kulakisa, kumonikisa.” Mpe ya kele yina Ndinga ya Nzambi ke salaka.

Bubu yayi beto ke tubaka, “Dibuundu ya Katolika kele Ndinga ya Nzambi; ba-Baptiste, ba-Méthodiste, bantu ya Pentecote, tabernacle.” Ya kele luvunu. Ndinga kele luzayikisu; Nzambi, me monisama na nzila ya Ndinga.

<sup>67</sup> Ve, beto lendaka ve kuzwa . . . kuzwa kulandila na kati ya lukolo ya minganga, na kati ya bantu ya science, na kati ya bantu yankaka.

Kana Einstein kuzwaka kaka nsadilu ya kimpeve, mutindu yandi kuzwaka nsadilu ya nsuni, na yina yandi longukaka misiku ya nsemo, mpe nyonso yina, yandi zolaka tuba na beto kima mosi. Ntangu mu kuwaka nsangu ya yandi na zulu ya sentele yina ya nene kisika mosi na kati ya mazulu, ti, “Beto kota mbala mosi na sentele yina, beto lenda vanga bantoto, kusala kima nyonso, mpe ngolo ke vwanda na nsuka ve.” Beno me mona? Yandi monaka yawu.

<sup>68</sup> Beno ke monaka mwa baposi yayi yina ke lutaka na zulu, yina ba ke bokilaka “ba-soucoupe,” nyonso yina. Bantu kele mingi. . . Ti, mbote, beto ke sala mbote na kubika yawu na lweka. “Beno ke kuwa bantu yayi nyonso me zimbana?” beno ke tuba. Bayina nsangu kele ve; ba kele kuna, mpe ba kele dyaka kuna ve.

Ya kele mutindu Enlevement ke vwanda. Mosi ya yawu ke kulumuka kaka, mpe nzutu yayi ya ntoto ke lwata nzutu ya mazulu. Mpe ba ke vwanda . . . ke bumbama, bansuki, to mikwa ke zimbana; nsobolo ke salama na ntangu ya fyoti, ke kubwa na

zulu mpe ke vutula yawu na Yinzo. Beto ke mona nyonso yayi kusalama na ntangu yayi, mpe—mpe Pentagon ke na kukiyufula na zulu ya bansemo yayi, mpe bansemo ya ngitukulu, mpe nyonso yina bawu ke na kumonaka na—na zulu. Beno me mona bawu vwandaka na mosi awa na zulunale ya Jeffersonville sabala yayi, mpe nyonso yina, “nsemo ya ngitukulu.” Na yawu, oh, bawu zaba ve yina yawu kele. Kasi beno kuwa, bana ya fyoti, Yawu ke baka beno, mosi ya bilumbu yayi. Beno me mona? Beno me mona? Beno vwanda na boma ve.

Beno bambuka moyo, Yesu tubaka, “Mutindu ya vwandaka na bilumbu ya Sodome.”

<sup>69</sup> Yinki salamaka na ntwala ya Sodome? Nzambi kulumukaka na mwa Bawanzio, mpe Bawu salaka fyongonina samu na lufundusu. Yandi tubaka, “Mu me kuwa kudila, ti ya kele na disumu mingi, ya nene, na yawu mu me kulumuka samu na kubakula kana ya kele nyonso kieleka to ve.” Ya kieleka? Beno tala mbote Muntu yina ya mfunu yina bikanaka na Abraham, Yandi vwandaka na lenda ya kumona mabanza vwandaka na kati ya ntima ya Sarah, na manima ya Yandi.

Ntangu yayi, beno tala kaka mwa fyoti na ziunga mpe beno tala, beno mona, beno tala mbote yina Yandi ke na kusalaka, kima mutindu mosi bubu yayi. Ya kele kufyongonina samu na lufundusu.

Na yina, na manima ya mwa ntangu fyoti, Dibuundu, ntangu Yawu ke lenda kuvwanda na kisika yina, mpe ti konso nkuna me natama na kisika ya yawu, ba ke kwenda. Ba ke zaba ve yina me salama na bawu. Mosi ke kwenda mutindu mosi. Beno me mona? Mosi ke vwanda ke na kwenda na yinzo ya pasteur, mpe mosi ke vwanda ke na kwenda *awa*, to *kuna*, mpe, kima ya ntete beno zaba, bawu kele dyaka kuna ve. Samu ti Enoch yina vwandaka kifwanusu, “Nzambi bakaka yandi, mpe ba talaka yandi ve.” Yandi kulumukaka samu na kufyongonina! Kulandila, mutindu luzangulu ya Enoch, kifwanusu ya Israël yina ba nataka na nzasa . . .

<sup>70</sup> Ya kulunga mingi, Ndinga ya Nzambi kele ya kulunga mingi, ata mpe Ngwisani ya Ntama mpe ya Malu-malu, kele bandambu zole mpe mosi ya muvimba. Ya kele kieleka. Ngwisani ya Ntama kele ndambu ya Yawu, mpe Ngwisani ya Malu-malu kele ndambu ya Yawu; kutula Yawu kintwadi, beno ke kuzwa luzayikisu ya muvimba ya Yesu Klisto. Kuna kele bapofete vwandaka zonza, mpe awa Yandi kele na kati ya Muntu; beno me mona, bandambu zole mpe mosi ya muvimba. Ntangu yayi beto zola ve kubaka mingi . . .

<sup>71</sup> Ntangu yayi, beno bambuka moyo, Ngwisani ya Ntama kele ve ya kulunga kukondwa ya Malu-malu. Mpe ya Malu-malu zolaka vwanda ve ya kulunga kukondwa ya Ntama. Ya kele samu na yina mu me tuba bandambu zole, mosi ya muvimba.

Na yina, baprofete vwandaka tuba, “Yandi ke kwiza! Yandi ke kwiza! Yandi ke kwiza; ba ke sala *yayi* na Yandi. Ba ke sala *yayi* na Yandi!” Mpe Yandi *yayi* awa, “Yandi vwandaka awa! Yandi vwandaka awa, mpe bawu salaka *yayi* na Yandi, mpe bawu salaka *yayi* na Yandi.” Mu me longa kaka na zulu yawu bankokila fyoti me luta.

<sup>72</sup> Ntangu *yayi*, samu na kulonguka Masonuku, Paul tubaka na Timothée, “Longuka Yawu, na mutindu ya kieleka longa Ndinga ya Nzambi, yina kele Kieleka.”

Ya kele na bafwana tatu na kati ya Masonuku. Na kusadilaka Ndinga ya Nzambi, ya kele na bima tatu yina beno fwana sala ve. Ntangu *yayi* beto longuka yawu na baminuti kumi yina ke landa; bima tatu yina beno fwana sala ve. Mpe bisika nyonso na yinsi, bisika nyonso beno kele, na yinsi ya muvimba, beno kotisa *yayi* mbote na dibanza ya beno kana beno kele na kilapi ve. Beno fwana sala bima *yayi* ve. Beto ke tubaka na beno ntangu nyonso mutindu beno fwana sala, ntangu *yayi* mu ke tuba na beno yina beno fwana sala ve.

<sup>73</sup> Ntangu *yayi*, beno fwana *tendula ve yimbi* Ndinga. Beno ke tubaka, “Mbote, mu banza ti Yawu zola kutuba *yayi*.” Yawu zola kaka kutuba yina Yawu me tuba. Yawu kele na nsatu ya mutendudi ve. Mpe beno fwana *tula ve yimbi* Ndinga. Mpe beno fwana *tambusa ve yimbi* Ndinga. Mpe kana beto ke sala to mosi ya *yayi*, ya ke kotisa Biblia ya muvimba na kati ya poto-poto mpe na kati ya kawo.

<sup>74</sup> Beno tala. Kutendula *yimbi* Yesu, na mutindu ya Nzambi na kati ya muntu, beno ke sala Yandi—beno ke sala Yandi Nzambi mosi na tatu. Na kutendulaka *yimbi* Yesu Klisto kele Ndinga, beno ke sala Yandi Nzambi mosi na tatu, to beno ke sala Yandi Muntu ya zole na kati ya Bunzambi. Mpe na kusalaka yawu, beno ke bebisa Masonuku nyonso. Beno ke kuma kisika mosi ve. Na yawu Yawu fwana kutendulama *yimbi* ve.

<sup>75</sup> Mpe kana beno ke na kutuba na kima mosi, beno tula lutendulu na Yawu, mpe ti beno tula Yawu na ntangu yankaka; to Yawu vwandaka samu na ntangu yankaka, beno me sala mpe lutendulu ya *yimbi*.

<sup>76</sup> Kana muntu kutendula *yimbi* Yesu Klisto na kati ya Biblia, na kuvwandaka ve Nzambi Yandi mosi, kusala Yandi Muntu ya zole, to Nzambi mosi na tatu, *yayi* ke mwangisa Ndinga nyonso na Biblia ya muvimba. Yina ke bebisa musiku ya ntete, “Nge ke vwanda na nzambi yankaka ve na ntwala ya Munu.” Mbote mingi. Yina ke kumisa Baklisto nyonso nkonga mosi ya misambidi ya mimpani yina ke sambilaka banzambi tatu ya kuswaswana. Beno mona mutindu ya Biblia beno ke kuzwa? Na yina ya ke sala beto yina Bazwife ke tubaka ti beto kele. Bawu ke tubaka, “Nani ya banzambi yina kele Nzambi ya beno?” Beno

me mona? Na yawu, beno me mona, beno lenda ve . . . Beno fwana tendula ve yimbi Biblia.

Samu ti, Yesu Yandi mosi kele lutendulu ya Biblia, ntangu Yandi me monisama na nsungi yina ndambu ya Nzutu ya Yandi me monisama. Kana ya kele na nsungi ya diboko, ya fwana vwanda diboko; ya lenda vwanda ve nsungi ya yintu. Kana ya kele nsungi ya ndinga, mbote, kuna, ya lenda vwanda ve nsungi ya makulu. Beno me mona? Mpe ntangu yayi beto kele na nsungi ya meso. Mpe ntangu yayi yina ke landa, kele Yandi Yandi mosi, yina fwana kwiza. Kumona; landila profesi!

<sup>77</sup> Beno me mona, nsungi mosi na nsungi yankaka, beto bandaka na fondasio, na kubandaka na nsungi ya dibuundu ya ntete; ntangu Nkuna kotaka na ntoto, Nkuna ya muvimba. Na manima ya me talana na makulu, Luther; me talana dyaka na nzila ya Wesley; na manima na Pentecote, bandinga, na bikoba, beno me mona; ntangu yayi ya kele na meso, landila profesi, ya Malachie 4, mpe nyonso yankaka yina. Mpe ntangu yayi ya kele na kima yankaka ve yina me bikana samu na yawu na kukwiza kasi Yandi Yandi mosi na kukota na yawu, samu ti yina kele kima ya nsuka yina kele.

Yina ke landa kele mayele, mpe beto kele na mayele ya beto mosi ve; ya kele ya Yandi. Beto kele na meso ya beto mosi ve. Wapi mutindu muntu lendaka mona na ntwala bima yina? Yandi lenda ve kusala yawu. Ya kele Nzambi Yandi mosi. Beno me mona, ya ke—ya ke na kukuma na kisika. Mpe Yandi me twadisa nzutu nzila nyonso, na yina Nzutu ya muvimba ya Klisto me monisama na nzutu ya Kento ya makwela yina ba basisaka na lweka ya Yandi, mutindu Adam salaka na mbandukulu . . . mutindu Adam vwandaka, mu zolaka tuba, na mbandukulu.

<sup>78</sup> Yinga, “nzambi,” yayi ke tula Biblia ya muvimba na kati ya poto-poto, ke bebisa musiku ya ntete, mpe kusala nzambi, nzambi ya mumpani ya tatu. Ya ke—ya ke bebisa kaka kizizi nyonso ya Biblia. Na yawu beno fwana tendula ve yimbi Biblia. Ntangu yayi, yina kele kaka kima mosi.

<sup>79</sup> Ntangu, konso Disonuku na Biblia kele na nsadilu mosi, beno fwana tula Yawu na kisika ya Yawu. Mpe kutula Yawu yimbi, beno lendaka tula Yandi Nzambi na nsungi mosi, mpe—mpe na nsungi ke landa beno ke sala Yandi disolo, na kutulaka Yawu yimbi. Na yawu beno fwana tula ve yimbi Masonuku. Yandi kele Nzambi na ntangu nyonso. Kana beno me sala Yandi bubu yayi Nzambi ya disolo, yinki vwandaka kuna na manima, mpe Yandi kele ve mutindu mosi bubu yayi, na yina yinki beno ke sala na Hébreux 13:8? Beno me mona, “Yandi kele mutindu mosi mazono, bubu yayi, mpe ntangu nyonso.”

<sup>80</sup> Ntangu yayi, na yawu beno tala yina yayi ke sala, mpe yina yawu salaka. Ya me salama yawu yimeni, na kutulaka yimbi Masonuku, me sala Yandi kumanga Ndinga ya Yandi Mosi.

<sup>81</sup> Na kutambusaka yimbi Masonuku, beno lendaka vukisa yimbi nzutu ya Yandi, makulu kisika yintu zolaka vwanda, to kima mutindu. Kaka mutindu mosi. . . Na Bampova yankaka, beno lendaka kuzwa Yesu kulonga nsangu ya Moise. Beno lendaka kuzwa. . . to dyaka Wesley kulonga malongi ya nsungi ya Luther. Beno lendaka vwanda awa, na nsungi ya beto, ke na kulongaka Pentecote, nsangu ya Pentecote. Beno ke mona na wapi poto-poto Yawu ke vwanda? Pentecote lakisaka yimeni bantinta ya yawu. Luther lakisaka yimeni ya yandi, kotaka na denomination. Yawu kufwaka kaka kuna. Nsungi bulaka; kuna yawu kwendaka.

<sup>82</sup> Beno tala, kaka na ntangu ba bongisaka yawu, ya kufwaka. Ntangu yayi, beno tala kaka kana ya kele kieleka ve. Beno vutuka kutala bapaze ya masolo. Konso ntangu yawu salaka organisation, yawu fwaka kaka kuna; ya vwandaka dyaka na yawu ata fyoti ve. Ya kumaka musambidi ya nzambi ya yinza yayi, mpe kotaka na ba-organisme, mpe ba-organisation, mpe ba-denomination, mpe mabanza. Nkonga ya ba-Ricky kotaka kuna mpe tulaka na kati balukanu ya bawu mosi na kati ya yawu, to kotisaka mabanza ya bawu mosi, na kisika, na kati ya yawu. Mpe yinki yawu pesaka? Yawu kumaka poto-poto. Na nsuka ke kuma na nzambi ya yinza yayi, kisika bawu ke tula na kiti ya kimfumu Satana yandi mosi, na kubanzaka ti bawu ke na kuzwa ntwadisi ya nene ya yinza samu na kunatila bawu ngemba.

<sup>83</sup> Mu tubaka na beno kilumbu yankaka yina, mu ke tuba dyaka yawu, ti ata civilisation yawu mosi bubu yayai kele kieleka ya kuswaswana na Nzambi. Civilisation kele ya kuswaswana na Nzambi. Ndongosolo kele mafuku ya bakilometele na Yandi; science kele mafuku ya bakilometele. Science mpe ndongosolo ke na kumekaka na kumanga Nzambi, beno me mona, na nzila ya baseminere ya théologie mpe balukolo, mpe bivinga ya science, mpe nyonso yankaka yina. Ba kuzwaka kuningana ya bawu.

Wapi mutindu samu na vision ya nkokila yankaka yina, ya muntu yina vwandaka boka na bantu ya science yina vwandaka dukula kima yina mutindu yina? Bawu balukaka kaka mpe talaka, mpe landilaka. Ya ke vwanda dyaka na kutambula mosi na mpunda.

<sup>84</sup> Beno tala, oh, bafwana tatu yayi fwana vwanda. Ntangu yayi, beno lenda ve. . . Yesu kwizaka ve na kulongaka nsangu ya Noé. Yandi kwizaka ve na kulongaka nsangu ya Moise. To, Moise kwizaka ve na kulongaka. . . Beno me mona, beno tambusa ve yimbi Disonuku. Ya fwana vwanda na ntangu. Ntangu yayi, beno lenda ve kutula. . . Ntangu muntu ya nene yina, John Wesley, kwizaka, to. . .

Muntu ya nene, Luther, ntangu Luther kwizaka na nsangu ya yandi ya kunungisama. Ntangu yayi ntangu yina vwandaka. . .

Luther vwandaka muntu ya nene. Yandi bokilaka dibuundu na kubasika na mpimpa, mpe yandi tulaka kunungisama na nzila ya lukwikilu. Mpe ntangu yandi salaka yawu, bawu tungaka organisation na zulu ya yawu, mpe yawu kufwaka. Luzingu salaka nzyetelo, mutindu yawu ke salaka na mwinga ya blé, mbala mosi na fololo ya blé, na nsungi ya Wesley. Kuna na Luther basikaka makasa yankaka, yina kufwaka na yawu, yina vwandaka Zwingli, mpe Calvin, mpe bawu nyonso yina basikaka na kusungika ya nene yina.

<sup>85</sup> Mpe kuna kwizaka Wesley, nsungi yankaka yina basisaka bafololo. Wesley, mpe Atterbury, mpe bawu nyonso yina, mpe—mpe Jean mpe mpangi ya yandi, mpe bawu nyonso, bantu ya nene ya Nzambi na nsangu, yina me komba yinsi. Bawu salaka organisation; yawu kufwaka.

Na manima ya basikaka na kutalaka kaka kieleka mutindu ti ya zolaka basisa mbuma ntangu yayi, mpe, beto bakulaka ti, ya vwandaka mpusu, Pentecote.

Kasi kuna na manima ya nyonso ya yawu, me basika mwa dititi.

Mpe beno ke tala, mbala na mbala. . . Mu banza, bamvula tatu to yiya na manima Luther vwandaka na bilanga ya kumwangisa nsangu, ti dibuundu ya ba-Lutherien kusalaka organisation. Kaka ntama mingi ve na manima Wesley vwandaka na bilanga ya kumwangisa nsangu, ba salaka organisation.

<sup>86</sup> Na Tucson, beto vwanda me kuzwa nsamunu ya mutindu dibuundu ya Wesley, to dibuundu ya ba-Methodiste, kotaka na luzingu. Mpe ntangu bawu kwizaka na Amerika awa, mingi na kati ya bawu vutukaka mpe tubaka ti bawu ke sala bisono mpe nyonso yina, katuka Angleterre, samu na kunata yawu awa, mpe mutindu ba salaka yawu nyonso samu na kitala-tala. Mu monaka kaka kuna yina salamaka. Kuna yandi kufwaka.

<sup>87</sup> Mbote, kuna me kwiza Pentecote, bantu ya ntama ya miloolo kuna na bilumbu mingi me luta, kuzwaka dikabu ya kuzonza na bandinga, mpe bandaka na kuzonza na bandinga. Kuna ba bokilaka yawu, “kimbangi ya Mpeve-Santu.” Na manima ba salaka organisation. Mosi tubaka ti yandi ke sala *yayi*, mpe yankaka *yina*, mpe bawu kuzwaka bamambu mpe bamambu. Yinki ya salaka? Mosi na mosi ya yawu makasa kuzibukaka, kaka mutindu yawu salaka na mwinga mpe mutindu yawu salaka na fololo. Ba kuzwaka ba-unitaire, ba-binitaire, ba-trinitaire, mpe dibuundu ya Nzambi, mpe nyonso yankaka yayi; kuzibukaka, kuzibukaka, kuzibukaka kaka.

Kasi ntangu yayi, landila yinza, yina kele kifwanusu ya kulunga, beno ke vwanda ata mbala mosi ve na kima samu na kupesa Yawu malongi.



<sup>88</sup> Dibuta mosi, ya bankundi ya munu kuna na Kentucky, me kuzwa kaka mwa—mwa bebe me butuka kilumbu yankaka yina, mpe mama vwandaka kuna ntangu ba vwandaka lamba madya ya beto ya nkokila. Mpe yandi vwandaka sadisa mpangi yankaka ya kento na kulamba madya ya nkokila samu na nkonga ya beto babakala yina katukaka na kuzomba. Mpe kuna bebe yina me banda na kudila, mpe mu vwanda zonza. Mu banza ti mama yina talaka mwa yimbi, na yawu yandi kimaka mpe kwendaka kuzwa bebe, mpe—mpe bandaka na—na kudikisa mwa mwana yango. Mu tubaka, “Nge zaba, yina kele kaka mutindu ya yinza.” Beno me mona? Ntangu yayi, beno lenda ve. . .

Bawu me kuzwa ntete ve mutindu mosi ya kulutila mbote samu na bebe na kuzwa yina yandi zola na kisika ya kudila samu na kuzwa yawu. Ntangu yayi, beno lendaka pesa yandi buku ya ethique, mpe kuvwanda awa mpe kutuba, “Mu zola kulungisa nge théologie, mwana. Ntangu yayi, kukota ve na kudila awa mutindu bana yankaka; nge kele mutindu yankaka. Ntangu yayi, kana nge zola kudya, nge bula mwa ngunga yayi awa.” Ya ke simba kaka ve. Ve, ya ke simba kaka ve.

<sup>89</sup> Na yawu, ntangu beno ke tala mbote yinza, ntangu yayi beto me mona kisika konso nsungi, mpe mbala mosi me lakisa yawu ti beto kele na nsungi ya nsuka. Mpusu me basika. Mpe beto me kuzwa bamvula kumi na tanu, pene ya bamvula, makumi zole ntangu yayi, ya Nsangu yina ke na kukomba bisika nyonso na yinsi na yinsi, mpe na suka yayi ya kuvukana na nsinga bisika nyonso na yinsi yayi, beno me mona, mpe ata organisation mosi ve. Yawu lenda sala organisation ve. Kima mosi ve me vwandaka ntete mutindu yawu, to ke vwanda na manima. Beno me mona?

Kima yina kele dyambu na Nsangu bubu yayi, kele, bayina ke kuzwa Yawu na kati ya bantima ya bawu fwana vwanda na Ntwala ya Mwana, samu na kuyela. Beno me mona? Beno lenda baka Nsangu, mpe kuna beno bika ti Mwana kusala beno kuya mpe kubasisa ngani nyonso na beno, beno me mona, mpe kusala beno Baklisto ya kukula. Beno me mona yina mu zola kutuba? Nzambi ke na kwiza ntama mingi ve, samu na kuzwa Dibundu ya Yandi, mpe beto fwana kuzwa mutindu ya Baklisto yina samu na Yandi na kuzwa. Blé fwana yela. Mbote mingi.

<sup>90</sup> Bafwana tatu yayi fwana vwanda. Yawu fwana kutendulama yimbi ve, to kusadila Yawu yimbi ve, kutendula Yawu yimbi ve, to ku- . . . to kutambusa Yawu yimbi ve. Ya fwana vwanda kaka kieleka mutindu Nzambi tubaka ti ya vwandaka.

Samu na yinza, Yawu kele Buku ya mansweki. Bantu ke banzaka ti Yawu kele kaka Buku mosi ya mansweki. Kilumbu mosi mu vwandaka solula na muntu mosi ya lukumu awa na mbanza, yandi kele ya kuzabana mingi na kati ya Miklisto, mpe yandi tubaka, “Mu mekaka na kutanga Buku ya Apocalypse mpimpa mosi.” Yandi tubaka, “Jean zola kudya kopo ya nene

ya bapili-pili ya ngolo mpe kuzwaka ndosi ya boma.” Beno me mona, Buku ya mansweki.

<sup>91</sup> Kasi, samu na mukwikidi ya kieleka, Yawu kele luzayikisu ya Nzambi yina me monana na nsungi beto ke na kuzinga. Yandi tubaka, “Bandinga ya Munu kele Mpeve mpe Luzingu.” Yesu tubaka yawu. Dyaka, “Ndinga kele Nkuna yina mukuni me mwangaka.” Beto zaba ti ya kele kieleka. Ya kele Nzambi na nzutu ya Ndinga, mpe lendaka vwanda ya kutendula kaka na Yandi mosi.

Dibanza ya muntu kele na lenda ve ya kutendula dibanza ya Nzambi. Wapi mutindu mwa—mwa dibanza ke suka ke tendula Dibanza ke suka ve, na yina beto lenda tendula kaka ve dibanza ya mosi na yankaka?

<sup>92</sup> Mpe beno tala, Yandi kele kaka Muntu yina lenda tendula Yawu, mpe Yandi ke tendula Yawu na muntu yina Yandi zola. Ya me tuba ve, “Bantu ya ntama yina zolaka kufwa, na yina bawu vwandaka tambula na ntoto na bambala mingi mpe mitindu mingi.” “Nzambi, na bantangu mingi mpe na mitindu mingi monanaka Yandi mosi na baprofete ya Yandi.” Beno me mona?

<sup>93</sup> Mpe, beno tala, “Na bayina Yandi ke talisa Yawu.” Mpe Yandi salaka mutindu yina ti Yandi lenda bumbama Yandi mosi na Masonuku, na muntu ya kulutila mayele ya theologie yina kele. Oh, la la! Yandi lenda bumbama kaka Yandi mosi, kuvwanda kaka kuna na Masonuku, mpe beno ke tala kilumbu ya muvimba mpe kumona yawu ata mbala mosi ve; kutala luzingu ya muvimba, mpe kumona yawu ata mbala mosi ve. Yandi lenda bumbama kaka Yandi mosi, ya kuvwanda kuna.

<sup>94</sup> Ntangu yayi, lemvo ya beno, bisika nyonso, ti ya kota mbote. Ti, Nzambi, na kati ya Ndinga, lenda bumbama Yandi mosi na kati ya Ndinga, ti ya kele ve na muntu ya théologie to lukolo na yinza yina lendaka kaka kutala Yandi, mpe dyaka Yandi kele ya kuvwanda kaka kuna.

Beno ke tuba, “Ya kele kieleka, Mpangi Branham?”

Wapi mutindu samu na ba-Pharisien mpe ba-Sadducéen? Wapi mutindu samu na konso nsungi? Yandi salaka yawu. Kieleka. Yandi salaka mutindu yina na konso nsungi. Ntangu yayi beto lenda tala yawu. Beto banza na bilumbu ya Noé; nsungi ya mayele, ya mayele mingi, mutindu Yandi kubumbamaka Yandi mosi na kati ya Ndinga ya Yandi ya nsilulu. Na bilumbu ya Moise, mutindu Yandi kubumbamaka Yandi mosi. Na bilumbu ya Elie, mutindu Yandi kubumbamaka Yandi mosi. Na bilumbu ya Yesu, mutindu Yandi kubumbamaka Yandi mosi. “Yandi vwandaka na yinza, mpe yinza kusalamaka na nzila ya Yandi, mpe yinza kuzabaka Yandi ve. Yandi kwizaka na baya Yandi Mosi; Baya Yandi kuyambaka Yandi ve.” Beno me mona?

<sup>95</sup> Yandi ke bumbamaka Yandi mosi na bantu ya mayele, ya kulutila mayele yina kele na zulu ya ntoto. Beno ke tuba, “Mbote,

yayi kele Mulongisi Tata Santu *Kingandi*.” Mu ke kipe ve nani yandi kele, Nzambi ke bumbama Yandi mosi na yandi; mpe ke monikisa yawu na babebe yina zola kulongoka, beno me mona, babebe ya Nzambi, nkuna yina ba soolaka ntete.

<sup>96</sup> Beno banza. Nzambi ya Ngolo nyonso, ya kuvwanda na kati ya Bandinga ya Yandi Mosi, ke kufwa meso ya bantu ya mayele, ya bantu kulongoka na nsungi yayi, mpe bawu ke na kumona yawu ve. Ba ke banza ti ya kele kaka nkonga ya bufanatiki. Beno tala Yandi ya kutelama kuna ke na kubumbama, na ba-Pentecotiste, na ba-Baptiste, na ba-Methodiste, na ba-Presbyterien. Ke talisa Yandi mosi pwelele na meso ya bantu, mpe ke talisa mambu nyonso ya mutindu na mutindu, ata mpe kutula yawu na mikanda, mpe bima ya mutindu yina, kasi bawu ke mona yawu ve. Oh, Nzambi ya beto, mutindu nene, Yandi mosi ke na kumonana na muntu nyonso Yandi zola.

<sup>97</sup> “Oh,” beno ke tuba, “Mpangi Jones to Mpangi *Kingandi*, yandi kele—yandi kele muntu ya nene. Yandi ke mona Yawu.” Oh, ve. Yandi ke monikisa Yawu na muntu yina Yandi zola. Beno ke tuba, “Kento ya munu ke mona Yawu ve, mpe yandi kele Muklisto ya kento.” Yandi ke monikisa Yandi mosi na muntu yina Yandi zola. “Mbote, pasteur ya munu kele muntu ya nene.” Ya kele kieleka, kasi Yandi ke monikisaka Yandi mosi na muntu yina Yandi zola. Ntangu yayi, beno tala na yina ba monikisaka, na yina ke na kusalamaka, kuna beno ke . . . beno lenda bakula yawu na malembe.

<sup>98</sup> Ntangu yayi beto ke tala kuna, ti ya ke sala Yawu Buku ya Nzambi mpe buku ya muntu ve. Kana Yawu vwandaka ya muntu . . . Ntangu yayi beto tala mutindu Yawu ke tuba Yawu mosi. Beno tala mutindu Yawu ke lakisa disumu ya bantu yina sonikaka Yawu, beno tala, bantu yina—yina zingaka na kilumbu ya Yawu.

Mutindu, Abraham, ba ke bokilaka yandi “tata ya lukwikilu.” Beno tala mutindu . . . Beno banza ti Abraham zolaka sonika Buku yayi na zulu ya yandi mosi, na zulu nkadulu ya yandi ya boma? Wapi mutindu beno ke banza ti yandi zolaka sonika ti yandi vunaka ntinu yina na suka yina, mpe tubaka ti ya vwandaka mpangi ya yandi ya kento, na yina ya vwandaka kento ya yandi? Yandi zolaka sonika na mambu ya yandi ya boma yina yandi salaka? Kieleka, yandi zolaka sala yawu ata mbala mosi ve.

<sup>99</sup> Wapi mutindu samu na Jacob samu na luvunu ya yandi? Mwa muntu ya luvunu Jacob yango vwandaka. Muntu lendaka, muntu Hebreux kusonika na mpangi ya yandi Hebreux, ti na nzila ya yandi yina ba kubokilaka Israel nyonso, yandi lendaka meka na kusonika luvunu ya tata ya kieleka ya yinsi ya muvimba? Na Jacob, kwizaka bankooko; na bankooko, kwizaka makanda. Mpe ditadi ya lufulu ya nyonso ya yawu, Biblia ke lakisa yandi

mutindu muntu ya luvunu. Ya kele kieleka? Nge banza ti muntu zolaka sonika yawu? Ve, tata.

<sup>100</sup> Wapi mutindu muntu zolaka sonika na zulu ya ntinu ya kulutila nene yina bawu me kuzwaka ntete ve awa na zulu ya ntoto, mutindu ntinu ba me byadisa; David, na kati ya pité ya yandi? Bazwife yina zolaka sonika kwandi na zulu ya ntinu ya bawu ya lukumu ti vwandaka muntu ya pité?

Oh, beto kele na disolo, mutindu, “George Washington me tubaka ata mbala mosi ve luvunu,” mpe bima ya mutindu yina. Beto ke tubaka, ke bokilaka yawu disolo.

Kasi yayi kele muntu, Biblia yina ke bokila David “muntu ya pité,” mpe yandi vwandaka. Ntinu ya Israël, muntu ya pité yina zolaka vwandaka mwana. . . . Yesu zolaka vwanda Mwana ya David. Ditadi ya kieleka ya yintu; mpe tata ya Yandi, landila nsuni, vwandaka muntu ya kinsuza. Bazwife zolaka ata mbala mosi ve kusonika Buku mutindu yina. Muntu zolaka sonika yayi na yandi mosi? Ya kieleka ve.

<sup>101</sup> Wapi mutindu yinsi yina ya lukumu Israel zolaka? Beno zaba mutindu ba vwandaka na lukumu. Yinsi ya lukumu Israel, kukwenda mpe kusonika na zulu ya kusambila ya bawu ya biteki, kusonika na zulu ya kukolama ya bawu na ntuala ya Nzambi ya bawu, kusonika na zulu ya bima ya yimbi, ya mvindu yina ba salaka, mpe kusonika na buku? Ya kieleka ba zolaka bumba yawu. Ba zolaka lakisa kaka bima ya mbote. Kasi, Biblia yayi, ya ke tubaka yina kele kieleka mpe yina kele luvunu. Ya kele, muntu nyonso zaba ti Bazwife zolaka sonika ata mbala mosi ve Buku mutindu yina, na zulu ya mambu ya bawu ya yimbi, mpe kusambila ya biteki, mpe kubwa, mpe nyonso yina bawu vwandaka na yawu. Ba zolaka sonika yawu ata mbala mosi ve. Oh, ve.

Na yina, Nani sonikaka Yawu? Biblia ke tuba, na Hébreux 1:1, “Nzambi, na bambala mingi mpe na mitindu mingi kuzonzaka na batata na nzila ya baprofete.” Na yina, ya vwandaka ve baprofete, ya vwandaka ve bantu yina ke kufwa. “Nzambi!” Ve “baprofete na bambala mingi.” Kasi, “Nzambi, na bambala mingi, na mitindu mingi kuzonzaka na batata na nzila ya baprofete.”

Mu kele na Disonuku ya kusonika awa. Mu zaba ve yinki Yawu kele; mu lenda ve kutala na Yawu. Ntangu nyonso, ntangu bima yayi mu ke talaka na yawu, mu ke talaka Disonuku. Mu ke tala kaka yawu minuti mosi, kana beno lenda lemvokila munu. Ya kele na Zole ya Timothée 3:16. Mu—mu—mu vwandaka banza ti mu ke bambuka moyo na yawu, kasi beno lemvokila. Mu ke telema kaka fyoti samu na kuzaba yina yawu kele.

<sup>102</sup> “Nzambi, na bambala mingi mpe na mitindu mingi kuzonzaka na batata na nzila ya baprofete.”

Ntangu yayi ya Zole ya Timothée 3, 3:16. Beto tala yina ya ke tuba na 3:16.

*Disonuku nyonso (yinga) me pesama na lutwadusu ya (Baprofete? Ve.) . . . lutwadusu ya kimpeve (Yinki?) Nzambi, mpe kele ya kulunga samu na kulonga, mpe samu na kungala, mpe kusemba, mpe malongi na kusungika:*

*Ti muntu ya Nzambi lendaka telama ya kulunga, na kusala bisalu nyonso ya mbote.*

<sup>103</sup> Mbote mingi, na yina, Disonuku nyonso me sonama na lutwadusu ya kimpeve. Yesu, awa na zulu ya ntoto, tubaka ti mazulu mpe ntoto ke luta, kasi Ndinga ya Yandi ke luta ve. Yandi tubaka Masonuku nyonso fwana lungisama. Na yawu kuna Buku kele ve buku ya bisono ya muntu. Ya kele Babuku ya Nzambi.

<sup>104</sup> Ntangu yayi, beto zaba ti Nzambi soolaka na nzila ya nsodolo ya ntete Dibuundu ya Yandi, kisika ya Yandi, baprofete ya Yandi, mpe nyonso yina. Na luzabu ya ntwala, Yandi soolaka na ntwala profete ya Yandi. Mpe ntangu nsungi vwandaka kuma, Yandi vwandaka sala profete ya Yandi kukuma na ntangu mosi yina, mpe vwandaka twadisa yandi na kimpeve na yina Yandi vwandaka sonika Biblia na nzila ya yandi. Ntangu yayi, Nzambi sonikaka Biblia na kusadilaka kaka profete, samu ti yina kele mutindu ya Yandi ya kusala yawu. Na yawu, beno me mona, ya kele ve ndinga . . . Na yawu, beno me mona, Yawu kele Ndinga ya Nzambi, mpe ndinga ya muntu ve.

<sup>105</sup> Nzambi kele Muntu. Nzambi lenda tuba. Nzambi lenda zonza. Nzambi lenda sonika. Yandi zolaka sala yawu ve mutindu yina, kasi ya kele mutindu Yandi—Yandi soolaka na kusala yawu. Yandi zolaka sala yawu ve mutindu yina, kasi Yandi soolaka na kusala yawu mutindu yina. Ntangu yayi beno ke tuba, “Nzambi sonikaka na musapi ya Yandi, na musapi ya Yandi Mosi ya lukumu, misiku kumi. Na yawu Nzambi zolaka sonika, Yandi mosi, kana Yandi zolaka.” Beno me mona? Kasi Yandi—Yandi soolaka na kusonika Yawu na nzila ya baprofete, beno me mona. Samu ti bawu vwandaka binama ya Yandi, Ndinga ya Yandi, Yandi vwandaka tuba na nzila ya bawu, na kusalaka bawu nyonso ndambu mosi, to ndambu mosi ya Yandi. Beno me mona? Yandi lendaka sonika na musapi ya Yandi. Yandi bakaka dyaka musapi ya Yandi mpe sonikaka na zulu ya bibaka ya Babylone, “Ba me teza nge na kitezolo mpe me talana kilo ve.” Yandi sonikaka na musapi ya Yandi Mosi.

<sup>106</sup> Nzambi lenda zonza. Beno ke kwikila ti Nzambi lenda zonza? Yandi zonzaka na Moise na mongo, na divunda ya tiya. Beno ke kwikila yawu? Yinga, tata. Yandi zonzaka na Jean, na mutindu ya yembe, (beno ke kwikila yawu?) ti, “Yayi kele Mwana ya Munu ya luzolo na kati ya Yandi Mu me sepela na kuzinga.” Yandi zonzaka na yandi. Yandi zonzaka na Yesu na Mongo ya Kukituka, na

ntwala ya Pierre, Jacques, mpe Jean. Yandi lenda zonza. Yandi kele baba ve. Nzambi lenda zonza. Na yawu Yandi zonzaka na—na Yesu na Mongo ya Kukituka. Mpe Yandi zonzaka na Yesu na ntwala ya kimvuka ya bantu mingi; ntangu, bantu tubaka yawu vwandaka nzasi, kasi ya vwandaka Nzambi vwandaka zonza na Yesu. Mpe na kutala Matthieu, Marc, Luc, mpe Jean, kele Yesu ke na kuzonzaka. Yandi kele Nzambi. Na yawu, Nzambi lenda zonza.

<sup>107</sup> Yandi bakaka misapi ya Yandi Mosi mpe sonikaka na zulu ya zyelo, kilumbu mosi. Yandi zonzaka, Yandi longaka, Yandi pesaka profesi, na bikoba ya Yandi Mosi, Nzambi salaka yawu, ntangu Yandi kumaka nsuni mpe zingaka na kati-kati ya beto, “Nzambi talisamaka na nsuni.” Kana Yandi lenda sonika, zonza, Yandi lenda zonza mpe ve yina ya kusala? Ya kieleka lenda. Yandi lenda zonza na bawu, na ndinga ya kimuntu. Yandi lenda sonika mpe kulakisa bawu yina ya kusala. Yandi salaka yawu.

Na yawu, “Nzambi, na bambala mingi mpe na mitindu mingi kuzonzaka na batata na nzila ya baprofete.” Mpe Yandi tubaka, na Kisono yayi, ti, “Ata kima ya kulutula fyoti to mwa kisono ke luta ntete tii Yawu kulungisama,” mpe kuna Yawu ke talana; na manima Yawu ke salama, samu ti Yawu me monisama. Ya lenda luta ve kuna, kasi kaka Ndinga Yawu mosi kukuma nsuni. *Kima ya kulutula fyoti* zola kutuba “mpova ya fyoti.” *Mwa kisono* zola kutuba “kidimbu ya fyoti.” Ata ponktwasyo mosi mpe, nzonzolo mosi, kima, ke kondwa na Ndinga ya Nzambi. Yawu lenda kondwa ve, samu ti Yawu kele Nzambi, Nzambi me monana na mutindu ya muntu. Samu ti, ya kele Nzambi Yandi mosi na mutindu ya kisono, na mutindu ya profete, me monisama na nzutu.

Ntangu yayi, ya kele samu na yina Yesu zolaka tuba, “Bayina zonzaka na beno, beno ke bokila bawu ‘banzambi,’ bayina zonzaka na beno na nzila ya Ndinga ya Nzambi,” Yandi tubaka, “mpe bawu vwandaka banzambi.” Baprofete yango ntangu ba vwandaka ya kupakula na Mpeve ya Nzambi, mpe nataka ya kieleka Ndinga ya Nzambi, na yina ba vwandaka banzambi. Ya vwandaka Ndinga ya Nzambi yina vwandaka zonza na nzila ya bawu. Mpe lenda . . .

<sup>108</sup> Bawu zolaka tendula kaka ntangu Mfumu zolaka pesa bawu muswa ya kutendula. Ntangu yayi kana beno zola kumona yawu, ya kele Zole ya Pierre 1:20 mpe 21. Mbote mingi. Samu, yayi, kisika Nzambi . . . “Ya kele na ata mutendudi ya muntu yandi mosi.” Yandi ke salaka lutendulu ya Yandi Mosi.

Nzambi ke zonzaka mpe ke tendulaka Yawu, Yandi mosi, mpe ke monikisa yawu na muntu nyonso Yandi zola, ke bumbama na bantu nyonso yankaka. Yandi kele ya kukwika ve na kumonikisa Yawu na muntu nyonso kana ti Yandi zola. Mpe Yandi kele ve . . . Yandi, Yandi me tuba kima mosi ya

Yandi nyonso na kati ya Masonuku, na yawu kima nyonso kele yimeni ya kuzabana; ya kele kaka Yandi kele kaka ya kuvwanda kuna ke na kutalaka mbote yawu kusalama. Beno me mona? Ve. Ke na kumonaka kaka Nzutu kukuma mpe kuvutuka na mutindu ya Yawu, na nzutu, Kento ya Yandi dyaka ya makwela. Mbote mingi.

<sup>109</sup> Bakwikidi ke kwikila Yawu, mutindu Abraham yina bokilaka bima yina vwandaka ya kuswaswana na Yawu mutindu ti yawu vwandaka ve.

<sup>110</sup> Yawu mpe, Ndinga yayi, ke mona mansweki ya bantima, Hebreux 4:12. “Yawu ke monaka mansweki ya ntima.”

<sup>111</sup> Baprofete ntangu nyonso vwanda bakulaka ve yina bawu vwanda sonikaka to yina bawu vwanda tubaka, to bawu zolaka na ata ndwenga kutuba yawu, kana bawu zolaka bakula Yawu. Beno me mona? Kasi Biblia ke tuba, “Bawu vwandaka ya kupusa na Mpeve-Santu.” Ya kupusa! Ntangu Mpeve-Santu ke pusa beno, beno ke kwenda. Muntu. . . “Nzambi, na bambala mingi mpe na mitindu mingi kuzonzaka na baprofete yina vwandaka ya kupusa na Mpeve-Santu.” Ya kele samu na yina, na bansungi nyonso, bantu yina vwandaka ya kimpeve vwandaka yufula baprofete na yina me tala bantangu mpe yina zolaka salama.

Musoniki-profete fwana vwanda na ngwisani ya ngolo na Musoniki. Beno me mona? Yandi fwana zinga ntangu nyonso na Ntwala ya Musoniki, samu na kuzaba yina Buku ke vwanda. Beno me mona? Musoniki-profete, yandi vwandaka ntangu nyonso na kilapi ya kuyilama, ngwisani ya ngolo na Musoniki, yina vwandaka Nzambi, samu na kusonika na bukebi nyonso yina Yandi vwandaka tuba na kusonika. Beno me mona? Ya ke lakisa mutindu ya luzingu yandi zolaka. . . luzingu ya kukabuka na bampangi ya yandi nyonso.

<sup>112</sup> Ntangu yayi, ya kele samu na yina profete vwandaka na dibanza ya yandi ntangu nyonso na yina Nzambi tubaka; ve yina muntu banzaka, yina nsungi banzaka, yina dibuundu banzaka, yina kimfumu banzaka. Yina Nzambi banzaka! Yandi tubaka kaka mabanza ya Nzambi na Ndinga, samu ti ndinga kele dibanza na ntangu yawu me tubama. Beno me bakula yawu ntangu yayi? Ndinga kele dibanza yina me tubama, na yawu profete vwandaka vingila mabanza ya Nzambi. Mpe na ntangu Nzambi vwandaka monikisa mabanza ya Yandi na yandi, yandi vwandaka tuba yawu na Ndinga, “MUTINDU ME TUBA MFUMU.” Beno me mona, ve “Mutindu me tuba munu, profete.” “MUTINDU ME TUBA MFUMU!” Beno me mona? Mbote mingi.

<sup>113</sup> Ya kele samu na yina bawu teleminaka bimfumu mpe bansungi ya dibuundu, yina, vwanda nata, na kitumbu ya lufwa. Beno ke belama na kizizi ya ntinu mpe ke tuba na yandi, “MUTINDU ME TUBA MFUMU, *yayi-mpe-yayi* ke salama,”

ba ke zenga beno yintu. Dibuundu ke pesa beno kaka mbala mosi na lufwa na kusalaka yawu. Kasi baprofete yayi vwandaka na kivuvu mingi. Samu na yinki? Ba vwandaka ya kupusa na Mpeve-Santu, beno me mona, mpe, bawu, ya kele samu na yina ba vwandaka na kivuvu mingi. Mpe bawu sonikaka Ndinga ya Nzambi yina ke kubwaka ve.

<sup>114</sup> Bantu mingi vwandaka meka na kulanda baprofete yina, mutindu banganga-Nzambi, to nyonso yina. Mpe yinki bawu salaka? Kaka poto-poto, kaka yina. Ba lendaka ve kusala yawu.

Samu ti, Nzambi soolaka muntu samu na nsungi, mpe soolaka Nsangu, mpe nkadulu ya muntu yina mpe yina zolaka salama na nsungi yina, yina Yandi zolaka tula, mutindu Yandi zolaka, na nkadulu ya mwa muntu yina, Yandi zola kufwa meso ya bantu yankaka. Bandinga yina muntu yina zolaka tuba, mutindu yandi salaka, zola kufwa meso ya bantu yankaka, mpe kuzibula meso ya bantu yankaka. Beno me mona? Yandi lwatisaka muntu yina na mutindu ya bilele yina yandi vwandaka; nkadulu, lukanu, mpe nyonso kaka mutindu yandi zolaka vwanda, kaka ya kusoola na mutindu ya kulunga samu na bantu mosi yina Yandi zolaka bokila samu na nsungi mosi yina.

Na yina, bayankaka zolaka telama mpe kutala yandi, kutuba, “Mbote, mu lenda ve. Ya kele. . . Mu—mu lenda ve kumona.” Ba vwandaka ya kufwa meso.

<sup>115</sup> Yesu kwizaka mutindu mosi, ya kulwata, Nzambi yina ke kufwaka ve ya kulwata nzutu ya muntu. Mpe samu ti Yandi kubutamaka na kidikulu, na yinzo ya bibulu ya kufuluka na matiti, kisika ve ya kutula yintu ya Yandi; ya kubutama, na kutala, na nkumbu ya makangu yina ba tulaka na manima ya Yandi. Beno me mona? Bima nyonso yayi yina Yandi vwandaka, mpe mutindu Yandi kwizaka, mwana ya kisadi-mabaya, mutindu Yandi kwendaka ve na lukolo.

Na kutala, na yinza, Yandi vwandaka ve na kima ya kusala na yawu, ndwenga ya yinza yayi. Ata mosi ya civilisation ya yinza yayi, ya ndongosolo, to ya kima mosi, Yandi vwandaka na kima ya kusala na yawu ve. Samu na yinki? Yandi kele Nzambi. Ya zolaka simba ve. Kana Yandi mekaka na kukwenda na seminere mosi kisika mosi mpe kulonguka kima yina mabuundu ya yinza yayi vwandaka sala, yinki na . . . Na yina, ya zolaka mpe ve. . . na yina, ya zolaka mpe ve. . . ya zolaka simba ata fyoti ve na lubakusu ya Yandi, samu ti Yandi vwandaka Nzambi.

Na yawu, ndongosolo, lukolo, baseminere, mpe nyonso, kele kieleka ya kuswaswana na luzolo ya Nzambi. Sysiteme ya muvimba ya ndongosolo kele ya kuswaswana na Nzambi. Nyonso ke longi mutindu yankaka na Nzambi, ntangu nyonso. Ntangu mu ke kuwa muntu kutuba ti yandi kele Docteur, ya Doctorat ya Philosophie, ya L.L.Q., yina ke sala kaka yandi ntama mingi na Nzambi, samu na munu. Beno me mona? Yandi



me kwenda kaka ntama mingi na yina ba bokilaka yandi kieleka na kusala na kulonguka. Ya kele kieleka.

Beno tala ntangu yayi mutindu yina bawu vwandaka ya kupusa na Mpeve-Santu.

<sup>116</sup> Ntangu yayi, ya zola kutuba ve ti bantu ya kulonguka lenda kukota ve. Beno tala Paul. Mu banza ti ya vwandaka ve na muntu ya mayele mingi na kilumbu ya yandi kulutula Paul, yina vwandaka Saul ya Tarse. Yandi longukaka na Gamaliel, mosi ya milongisi ya kulutula nene ya kilumbu yina; Hébreux ya nene, ya kusungama, Pharisien ya denomination. Mpe Paul vwandaka mulonguki ya yandi. Yandi zabaka lukwikilu nyonso ya Bazwife. Kasi ntangu yandi kwizaka na dibuundu, yandi tubaka, “Ata mbala mosi ve ti mu me kwiza na beno landila ndongosolo ya muntu, mpe nyonso yina. Samu ti, kana ya vwanda, kuna beno ke tula kivuvu na yawu. Kasi mu me kwiza na beno na ngolo mpe kumonisama ya Mpeve-Santu, ti lukwikilu ya beno ke vwanda na Nzambi.” Beno bawu yayi. Beno me mona? Ya kele kieleka.

<sup>117</sup> Bantu mingi mekaka na kulanda bantu yayi, kasi ba kumisaka kima nyonso poto-poto kaka mutindu ba ke salaka bubu yayi. Ya vwandaka na mosi yina telamaka na ntwala ya ntangu ya Yesu, yina twadisaka bankama yiya ya bantu na nzila ya yimbi. Mpe beno zaba mutindu Masonuku ke lakisa bima yayi, na kumekaka na kusala yawu ntete ntangu kukwiza. Mpe bayankaka na kati ya bawu mekaka na kulanda Yandi, mpe bawu nyonso vwandaka *yayi, yina, to yankaka* yina. Mpe Yandi tubaka, “Na bilumbu ya nsuka, mutindu bawu ke telemisa Baklisto ya luvunu, na bilumbu ya nsuka, mpe baprofete ya luvunu, mpe ke talisa bidimbu mpe mambu ya ngitukulu.” Beto kele na nyonso yina. Beno me mona? Kasi yina ke katula ve ya kieleka. Yina ke sala kaka ti Yawu kulezima mbote mingi, samu ti beto kele na Klisto ya kieleka, ya luvunu ve.

<sup>118</sup> Ntangu yayi, awa, beto ke bakula kuna ti Nzambi fidisaka baprofete ya Yandi. Yina vwandaka mutindu Yandi zolaka nata Ndinga ya Yandi na bantu, na nzila ya bikoba ya baprofete ya Yandi.

Mpe beno tala, beno zaba, Moise tubaka, kana beno zola kutanga yawu na Exode kapu 4, mpe na nzila ya 10 mpe nzila ya 12. Moise tubaka ti Nzambi tubaka na yandi. Nzambi tubaka na muntu, yinwa na dikutu. Mpe yandi tubaka, “Mu ke kekamaka na kuzonza,” Moise tubaka. “Munu, mu kele ya kulunga ve. Mu—mu lenda kwenda ve.”

<sup>119</sup> Yandi tubaka, “Nani salaka muntu kuzonza, to Nani salaka yandi baba? Nani salaka yandi kumona, to Nani salaka yandi kuwa? Munu ve, Mfumu?” Yandi tubaka, “Mu ke vwanda na yinwa ya nge.” Beno me mona? Na yawu . . .

<sup>120</sup> Mpe Jérémie tubaka, kana beno zola kutanga yawu na Jérémie 1:6. Jérémie tubaka ti, “Nzambi me tula bandinga

na yinwa ya munu.” Beno me mona? Yandi—Yandi zonzaka, yinwa na dikutu, na profete mosi; mpe zonzaka na nzila ya profete yankaka, na yina yandi yayi kukitwadisamaka ve, mpe vwandaka zonza na nzila ya bikoba ya yandi.

<sup>121</sup> Yandi kele na mitindu ya kubasisa Ndinga ya Yandi, beno zaba. Yinga, tata. Na yawu beno ke mona ti Biblia kele Ndinga ya Nzambi, ve ndinga ya muntu.

Moise tubaka, “Nzambi tubaka na munu na Ndinga mosi, mpe mu kuwaka Yandi. Mu sonikaka yina Yandi tubaka.”

<sup>122</sup> Jérémie tubaka, “Mu lendaka ata fyoti ve kutuba. Mpe, kima ya ntete beno zaba, bikoba ya munu vwandaka zonza, mpe—mpe—mpe mu vwandaka sonika.” Nzambi zonzaka na nzila ya bikoba ya yandi, mpe ya salamaka.

Daniel, Esaie, mpe nyonso yina, baprofete nyonso yina vwandaka kaka mutindu mosi.

<sup>123</sup> Beno zaba, kaka na Ngwisani ya Ntama, ya kele ya kulutila bambala mafunda zole ti baprofete yina kutubaka MUTINDU ME TUBA MFUMU. Ntangu yayi, kana muntu tuba MUTINDU ME TUBA MFUMU, ya kele ve muntu ke na kuzonza. Kana yandi sala, yandi ke vwanda profete ve, yandi ke vwanda muntu ya luvunu, beno me mona, samu ti ya ke salama ve (ata mbala mosi ve); yandi lendaka kuzwa, siansi mosi na kati ya bambala bankama kumi ya mafunda, beno me mona. Kasi kana ya kele MUTINDU ME TUBA MFUMU, Mfumu Nzambi me tuba yawu.

Kana mu lendaka tuba, “Mutindu me tuba Orman Neville”; mpangi ya munu ke tuba, “Mutindu me tuba Tata Mann”; Mu ke tuba, “Mutindu me tuba Mpangi Vayle,” awa, to mosi ya bampangi yankaka, mosi ya beno; mu ke zonza yina beno me tuba. Kana mu kele muntu ya kieleka, mu ke tuba kaka yina beno me tuba.

Mpe bantu yayi, na kuvwandaka baprofete, bawu tubaka, “Ya kele munu ve. Mu kele na kima ve ya kusala na yawu, kasi ya kele MUTINDU ME TUBA MFUMU.” Na yawu Biblia kele MUTINDU ME TUBA MFUMU na nzila ya baprofete.

<sup>124</sup> Beno tala, bawu vwanda nata Mpeve ya Klisto na zulu ya bawu, mpe vwanda tuba mambu yina ke salama na ntwala. Beno ke zonzila na yina me tala kuzonza mambu na ntwala! Bawu tubaka yina zolaka salama na nzila ya bansungi, na yina bawu vwandaka, ya kutelama, ya kulala, vwandaka tambula na Mpeve ya Klisto na zulu ya bawu, na mutindu ti bawu salaka mutindu Klisto. Mpe mitangi zolaka tanga yawu mpe kubanza ti baprofete vwandaka zonza na bawu mosi.

Beno ke bambuka moyo na kalaka na yina yandi vwandaka tanga Ésaie 53:1, na yina mutindu, ti, “Yandi lwalaka samu na masumu ya beto, kubukamaka samu na disumu ya beto ya nko, kitumbu ya ngemba ya beto kubwaka na zulu ya Yandi,

na bamputa ya Yandi beto me beluka”? Kalaka tubaka na Philippe, “Na nani profete ke na kuzonzila, na yandi mosi to muntu yankaka?” Beno me mona, profete zonzaka mutindu ti ya vwandaka yandi mosi.

<sup>125</sup> Beno tala David kudila na Kimpeve, “Nzambi ya Munu, Nzambi ya munu, samu na yinki Nge me bika munu? Mikwa ya munu, ke tala munu, munu,” David. “Ba me tobola makulu ya munu mpe maboko ya munu,” David. “Ba me tobula makulu ya munu mpe maboko ya munu. Kasi Nge ke bika ve moyo ya munu na difelo, to dyaka Nge ke bika santu ya Nge kumona kubola,” mutindu ti David vwandaka zonzila na yandi mosi na kuvwandaka santu. Ya vwandaka Mwana ya David, yina vwandaka ke kuyela, Nkuna ya kimpeve yina ke lutila kuna. Ata ti David yandi mosi vwandaka dititi ya yimbi, kasi na kati kuna vwandaka na mbuma ya Blé. Beno me bakula yawu?

Na yawu, Biblia ya muvimba kele ve ndinga ya muntu, to dyaka ti Yawu kusunamaka na muntu, kunatamaka na muntu, to dyaka Yawu lenda vwanda—vwanda ya kumonisama na muntu. Ya kele Ndinga ya Nzambi me monisama na nzila ya Nzambi Yandi mosi, Mutendudi ya Yandi Mosi, Klisto na kumonisamaka Yandi mosi na Ndinga ya Yandi Mosi.

<sup>126</sup> Beno tala Klisto ya kutelama awa na David. David zolaka banza mpe ve ntangu yayi. Mabanza ya yandi kwendaka ntama na yandi, mutindu ya vwandaka. Mpe Yandi vwandaka na zulu ya kulunsi, mutindu beno ke mona kiteki awa; na zulu ya kulunsi, na kudilaka, “Nzambi ya Munu, Nzambi ya Munu, samu na yinki Nge me bika Munu? Mikwa ya Munu nyonso, ke tala Munu. Ba me tobola maboko ya Munu mpe makulu ya Munu. Ba me tobula lweka ya Munu.” Beno me mona? “Samu na yinki Nge kele ntama mingi na Munu? Bangombe nyonso ya Basan ke zungidila munu. Ba ke ningisa bayintu ya bawu, na kutubaka, ‘Yandi tulaka kivuvu na Nzambi, ti Yandi ke vulusa Yandi; ntangu yayi beto tala kana Yandi ke vulusa Yandi,’” na kuzonzaka bampova mosi.

Na yawu, beno me mona, ntangu Nzambi kutalisamaka na zulu ya ntoto awa, Yandi tubaka bampova mosi David tubaka. Beno me bakula yawu? Na yawu, beno me mona, Ya kele ve ndinga ya muntu; Ya kele Ndinga ya Nzambi. Ya vwandaka Nzambi na kati ya David; ya vwandaka ve David. Yandi zabaka ve yina yandi vwandaka tuba; yandi vwandaka kaka mingi na kati ya Kimpeve.

Ya kele mutindu Moise vwandaka. Yandi vwandaka mingi na kati ya Kimpeve, yandi vwandaka me luta na kitezo yina yandi vwandaka zingila, mpe telemaka kuna kizizi na kizizi, na divunda yina ya tiya, na kuzonzaka na—na—na Nzambi Yandi mosi. Yandi tubaka, “Katula basapatu ya nge. Ntoto nge me telama kele ntoto ya santu.”

Mu ke banza ntangu Moise katukaka kuna, yandi banzaka, “Yinki me salama? Yinki me salama? Yinki ya vwandaka?”

Yandi tubaka, “Kwenda na Égypte. Mu ke kwenda na nge.”

Yandi tubaka, “Ya kele kieleka samu na munu, mu fwana kwenda.” Yandi kuzwaka kento ya yandi mpe bana ya yandi. . . mpe—mpe mwana ya yandi, mu zolaka tuba, mpe nkawa ya yandi na diboko ya yandi, mpe kwendaka na Égypte, na kuvulusa bantu. Beno me mona?

<sup>127</sup> Nzambi na kuzonzaka, Yandi mosi, na nzila ya baprofete. Beno me mona, bawu, kieleka bawu kele. . . Ya kele ve baprofete; ya vwandaka Nzambi. Samu ti, baprofete, bawu mosi, bawu zolaka tuba ve mambu yina.

“Nani me kwikila kimbangi ya beto?” Ésaïe tubaka, beno me mona. “Nani me kwikila kimbangi ya beto? Na nani diboko ya Mfumu me monisama? Yandi ke yela na ntuala ya beto mutindu mwana ya ngombe na—na kidikulu. Mpe mutindu ti, dyaka, Yandi lwalaka samu na masumu ya beto, kubukamaka samu na disumu ya beto ya nko, kitumbu ya ngemba ya beto na zulu ya Yandi; na bamputa ya Yandi beto me beluka.” Beto belukaka, ntama kuna na nsungi yayi awa; mpe Esaïe, kuna bamvula bankama nana na ntuala ya Klisto. Beno me mona? “Na bamputa ya Yandi beto me,” na ntangu me luta, yimeni, “beluka.” Oh, la la!

Mutindu, Ndinga ya Nzambi, kele mingi ya kulunga! Beno tula kivuvu na Yawu, bampangi. Ya kele kima kaka yina lenda vuukisa beno.

<sup>128</sup> Bandinga nyonso yankaka, mu ke kipe ve mutindu mbote ba ke tula yawu, mutindu, na nani ya me katuka, na wapi denomination ya me katuka, to mutindu mayele kele muntu yina, ya fwana tulama kaka na lweka, kima nyonso ya kuswaswana na Ndinga. Kana beno zola kusonika Masonuku yango, ya kele Galates 1:8. Beno me mona? Paul tubaka, “Ata ti beto, to Wanzio me katuka Mazulu, ke longa kima mosi yankaka na Yayi yina beno kuwaka yimeni, ti yandi vwanda ya kusinga.”

Na nzonzolo yankaka, kana Wanzio ke kwiza na beno me katuka Mazulu, Wanzio ke lezima na nsemo, mpe ke telama; oh, yina ke vwanda pambu ya kilumbu yayi, mutindu yina ve? Wanzio ke lezima na nsemo ke kwiza kuna mpe ke telama, mpe ke tuba bima ya kuswaswana na Ndinga; beno ke tuba, “Satana, katuka pene-pene ya munu.” Kieleka. Kana yandi kele bishop, kana yandi kele. . .nyonso yina yandi kele, beno kwikila ata mbala mosi ve na yandi kana yandi zonza ve kieleka na Biblia yina, Ndinga na Ndinga. Beno tala yandi mbote, yandi ke nata beno na Biblia awa. Yandi ke nata beno na kisika mosi kuna, mpe na manima ke balula kaka yawu kuna. Na ntangu beno ke mona Biblia ke tuba dyambu mosi, mpe yandi kubaluka na yawu, beno tala kaka yandi mbote kuna.

Beno me mona, ya kele mutindu yina yandi salaka na Eve. Yandi kulumukaka kuna mpe tubaka kaka nyonso kieleka. “Mbote, Nzambi tubaka *yayi*.”

“Ya kele kieleka, Eve. Amen. Beto ke kwikilaka yawu, kintwadi.”

“Mbote, Nzambi tubaka *yayi*.”

“Amen. Beto ke kwikilaka yawu, kintwadi.”

“Nzambi tubaka *yayi*.”

“Beto ke kwikilaka yawu, ya kieleka.”

“Mbote, kasi Nzambi tubaka ti beto ke kufwa.”

<sup>129</sup> “Mbote, ntangu yayi, nge zaba ti Yandi kele Nzambi ya mbote.” Yandi tubaka ve ti Yandi vwandaka ve, beno zaba. “Kasi ya kieleka . . .” Oh, la la! Yandi yina.

Mpe kana yandi vwandaka ya luvunu mutindu yina, mpe Biblia ke tuba, “Na bilumbu ya nsuka yandi ke vuna Misoolami kana ya lendaka salama,” wapi kisika beto fwana vwanda bubu yayi, bankundi? Ntangu yayi, mwa baleso ya lukolo ya Lumingu yayi, fwana natama mingi pene-pene, beno zaba, na bantima ya beto, samu na kumona . . . Beto fwana kuwa kieleka mbote mpe kumona mutindu luvunu kele kima yina.

<sup>130</sup> Beno tala, beto lenda ve, beto fwana ve, kuwa ndinga ya muntu yankaka. Beto ke kipe ve mutindu ya mayele, mutindu ya ndongosolo. Biblia, na Proverbs, ke tuba, “Beto fwana losa bangindu.” Beno me mona? Ntangu yayi, awa na kitezo ya zole yayi . . .

Kitezo ya ntete kele ba-sense ya beno ya kumona, kuwa na yinwa, kusimba, kuwa nsunga, mpe kuwa. Yina kele na ngaanda ya nzutu ya beno.

Na kati ya nzutu, yina kele mpeve, ya kele na bangindu, mpe kubanza, mpe nyonso yina. Beto fwana losa nyonso yina. Ngindu lenda ve, kutuba, “Ntangu yayi vingila, kana Nzambi kele Nzambi ya mbote . . .” Mpe ba ke tuba na beto mingi bubu yayi ti Yandi kele. “Kana Yandi kele Nzambi ya mbote, na yina kana mu vwanda ya kusungama, ata ti mu lenda ve kumona yawu na kati ya Biblia yina kuvwanda ya kusungama, ata ti mu vwanda ya kusungama, mu ke kuzwa mpulusu.” Beno ke zimbana. [Kisika ya mpamba na bande—Mu.]

<sup>131</sup> “Kana mu kwenda na dibuundu mpe mu sala mambu yina mu ke kwikila ti kele ya kieleka, mpe kumeka na kutelama na yina mu banza kele mbote, mbote, mu . . .” Beno kele dyaka ya kuzimbana.

“Ya kele na mutindu yina ke monana mbote na muntu, kasi nsuka ya yawu kele banzila ya lufwa.” Beno me mona? Beno ke kuzwa mpulusu ve; beno ke zimbana. Beno me mona? Beno me mona? Ya fwana vwanda Muntu yina ya kati ke twadisa.

<sup>132</sup> “Mbote, mu zonzaka na bandinga, Mpangi Branham. Mbote, nge ke kwikilaka ve na kuzonza na bandinga, Mpangi Branham?” Kieleka. “Mbote, mu bokaka; nge ke kwikilaka yawu ve?” Yinga, tata. “Mu ke zingaka luzingu ya Muklisto ya mbote. Nge ke kwikilaka yawu ve?” Yinga, tata. Kasi yina zola ve kutuba ti beno me vuuka. Beno kele muntu ya mbote; muntu ya mbote, ya kutsyema, ya buzitu, ya santu.

Mutindu mosi vwandaka banganga-Nzambi yina, misambidi tii na musisa, misambidi ya kulutula tii ntangu mosi vwandaka bangula yimbi, ba zolaka kufwa yandi na matadi. Kitumbu ya lufwa na kusakanaka na Ndinga ya Nzambi vwandaka lufwa.

<sup>133</sup> Yawu yina dyambu na yinsi ya beto bubu yayi. Ya kele samu na yina beto kele na bima mingi ke katuka mutindu dikasa na ntoto bubu yayi, bitumbu kele ngolo mingi ve. Kana ba simba muntu ke na kubasika na kento ya muntu yankaka, ba zolaka nata bawu zole na ntuala ya bantu mpe kukatula binkonga, kaka, na ntuala ya bantu, mpe kubika bawu. Ya kele kieleka. Kana ba simba muntu ke na kusalaka kima ya yimbi, na nzila, ke tambula na ditoma na mbangu, ba fwana pesa ve yandi kitumbu na yisi ya bamvula kumi; yandi me ka- . . . kanisaka kufwa bantu. Beno me mona? Beno tula bitumbu mutindu yina na zulu ya yawu, beno ke lembisa bawu.

Kasi ntangu muntu mosi ya politiki ya yimbi lenda kuma na *yayi* awa mpe ke lutisa yawu, mpe ke tuba, “Mbote, yandi vwandaka me kunwa fyoti, yandi vwandaka . . . zolaka ve kusala yawu.” Mpe ke kufwa bakala, kento, mpe nkonga nyonso ya bana yina zaba dyambu ve, ti kubika Ricky yina kubasika mutindu yina, yina kele politiki. Yina kele yinza. Yina kele dyabulu.

<sup>134</sup> Nzambi tubaka kana ba simba bakala mosi, to kento mosi na kati ya pité, beno basisa bawu kuna mpe beno kufwa bawu na matadi. Yina sukisaka dyambu. Beno me mona? Mpe kana ba simba yandi ke na kulokota mwa kilo ya nkuni, na kilumbu ya saba, “Beno baka yandi mpe beno losa yandi matadi.” Ba vwandaka zinga na yawu kuna. Mpe ntangu yayi, beno me mona, beto kele ve na mutindu ya misiku yina bubu yayi.

Kasi Muklisto, dibuundu, yina mu ke na kuzonzila na suka yayi, musiku yina ya Nzambi kele na kati ya ntima ya beno. Beno me mona? Beno kele ve na nsatu ya kusala yawu. Ya kele na kati awa. Beno zola kuzitisa musiku ya Nzambi na mutindu ya kulunga mingi. Ata yina ya kele, beno zola kaka kuvwanda yina . . . Kana—kana Nzambi ke na nsatu ya payaso na mwelo, Yandi zola ti beno vwanda payaso yina, beno kele na kyese mingi na kuvwanda mutindu yina. Ata nyonso yina ya ke vwanda, beno zola kuvwanda payaso. Beno me mona? Nyonso yina Nzambi zola ti beno sala, ya kele yina beno zola kusala, samu ti ya kele Nzambi. Ntangu yayi, ya kele kisika beno ke tala, zola ya beno ya kieleka, ya kieleka samu na Nzambi.

<sup>135</sup> Ntangu yayi beto ke tala kuna, ti, “Wanzio ke longa kima yankaka,” na lweka yankaka, na yina yimeni tubamaka na kati ya Biblia, “ti yandi vwanda ya kusinga.” Muntu ve lenda. Lenda sala yawu; Yawu fwana vwanda kaka kieleka mutindu Yawu ke tuba.

<sup>136</sup> Mpe dyaka beto ke tanga, na Apocalypse 22:18 mpe 19, “Kana muntu mosi ke bwela ndinga mosi na Yayi, to kukatula Ndinga mosi na Yawu, Nzambi ke katula ndambu ya yandi na Buku ya Luzingu.” Kieleka. Nzambi ke katula ndambu ya yandi, ata ti yandi kele mulongi, nyonso yina yandi lendaka vwanda, mpe ndinga ya yandi. . . nkumbu ya yandi kele ya kusonika na Buku ya Luzingu. Nzambi tubaka, “Mu ke katula kaka yawu,” ya kele kieleka, “kana yandi bwela kima mosi na Yawu, to katula Ndinga mosi na Yawu.” Ya kele mutindu Nzambi ke kondwaka ve salaka Ndinga ya Yandi. Beno me mona? Beno lenda bwela na dibuundu, to kukatula na dibuundu. Beno bwela ve na Ndinga yina, to kukatula na Yawu, samu ti Nzambi ke katula nkumbu ya beno mbala mosi na Buku ya Luzingu. Mpe, ya kele, samu na beno yimeni. Beno me mona? Beno lenda bwela na Yawu ve, to kukatula na Yawu. Ya kele kaka kieleka yina. . .

<sup>137</sup> Ya kele na nsatu ya mutendudi mosi ve, samu Biblia ke tuba ti Nzambi ke salaka lutendulu ya Yandi Mosi ya Biblia. “Ya kele ve lutendulu ya muntu yandi mosi,” tubaka Pierre. Mbote mingi.

<sup>138</sup> Mpe Masonuku nyonso me pesama na mutindu ya Kinzambi, ya kusungama na mutindu ya Kinzambi, mpe kima ya muvimba kele luzayikisu ya Yesu Klisto. Ngwisani ya Malu-malu mpe ya Ntama, kele kisika ba zonzilaka na ntwala na nkwezulu ya Yandi, na yina Yandi ke sala ntangu Yandi ke kwiza awa, mpe yina Yandi ke sala na nsungi yayi ke kwiza. Na yawu yina ke sala Yandi mutindu mosi mazono, bubu yayi, mpe ntangu nyonso. Beno me mona?

Mutindu na Hébreux kuna, ntangu Paul sonikaka yawu. Yandi kele Nzambi, “Yesu Klisto mazono,” ya Ngwisani ya Ntama. Yandi kele “Yesu Klisto bubu yayi,” yina monisamaka na nsuni. “Mpe Yandi kele Yesu Klisto ntangu nyonso,” na Mpeve, “yina ke kwiza.” Beno me mona? Beno me mona? “Mutindu mosi mazono, bubu yayi, mpe ntangu nyonso.”

Mpe Yandi ke zinga ntangu nyonso samu na kusala Ndinga ya Yandi kuzinga yina Yawu tubaka ti Yawu ke sala samu na nsungi yina. Yandi kele moyo.

<sup>139</sup> Yandi vwandaka moyo na Ngwisani ya Ntama, ya kumonisama. Mu zola kaka ti beno kumona mwa kima mosi awa, kana beno lenda ndima yawu. Beno tala mbote, ntangu Yesu kumonisamaka na Ngwisani ya Ntama, mutindu beto ke kwikilaka yawu.

Ntangu yayi, beno milongi kuna, beno lenda swana na yawu, kusala nyonso yina beno zola, kasi mu ke na kuzonzilaka na ya munu. . . yina mu banza. Beno me mona?

<sup>140</sup> Ntangu Yesu kumonisamaka na Ngwisani ya Ntama, na théophanie, na muntu ya Melekisedeki; ve kinganga, kasi Muntu, ya Muntu. Beno me mona? Samu ti, Muntu yayi vwandaka me butuka ntete ve, kasi Yandi vwandaka na théophanie, na yawu Yandi vwandaka na tata ve, mama ve. Yandi vwandaka Nzambi Yandi mosi. Yandi kumonisamaka na nzutu ya Muntu, ba bokilaka, “Ntinu ya Salem, yina kele Ntinu ya Ngemba, mpe Ntinu ya Ludedomo.” Beno me mona? Yandi vwandaka Melekisedeki. “Yandi vwandaka na ata tata to mama ve, mbandukulu ya bilumbu to nsuka ya luzingu.” Beno me mona? Ya vwandaka Yesu na théophanie, na nzutu ya Muntu. Beno ke na kulenda munu? Mbote mingi.

<sup>141</sup> Kuna kieleka Yandi kumaka muntu na nsuni, mpe zingaka na kati-kati ya beto, na Muntu ya Yesu Klisto Yandi mosi, butukaka na mwense Marie. Yandi kwizaka na mutindu yina samu Yandi kufwa, mpe vutukaka na Mazulu.

Ntangu yayi na bilumbu yayi ya nsuka, Yandi silaka na kumonisama Yandi mosi na muvimba dyaka, ya nzutu ya Yandi, na Mpeve. Beno me mona? “Samu ti mutindu yawu vwandaka na bilumbu ya Sodome, mutindu mosi yawu ke vwanda na Nkwizulu ya Mwana ya muntu.” Ntangu yayi beno tala Sodome, mutindu ya vwandaka, mpe yina salamaka. Mpe Yesu Klisto na kutalanaka na kati ya mutindu ya nzutu, ya Dibuuundu ya Yandi bubu yayi, beno me mona, ke na kusalaka kima ya mutindu mosi, kisalu ya mutindu mosi, bima ya mutindu mosi yina Yandi salaka ntangu nyonso, ke sobaka ata mbala mosi ve, Muntu ya Seko. Beno me mona? Mpe na zulu ya ntoto bubu yayi, Yandi me talana Yandi mosi na kati ya banzutu ya bantu, banzutu ya beto ya kimuntu yina Yandi me bokila, mpe me sala kieleka kima ya mutindu mosi yina Yandi salaka na bambala mingi, mpe na bantangu ya nsuni ya Yandi na zulu ya ntoto. Mpe ke na kusalaka kima mutindu mosi bubu yayi, samu ti, “Nzambi na bambala mingi kuzonzaka na batata na nzila ya bapofete, na bilumbu ya nsuka yayi na nzila ya Mwana ya Yandi, Yesu Klisto.” Beno me mona, Mwana me monisama na bilumbu ya nsuka, Nzambi ya kumonisama na kati ya nsuni ya muntu, ya kuvwanda kaka na ntwala ya mwangusulu ya Sodome, nsuka ya yinza ya Bantu ya makanda. Beno me mona yawu?

Bakumonisama kele tatu.

<sup>142</sup> Ntangu yayi, kima ke landa na kusalama, kele ntangu yawu kele nyonso ya kuvukana na kati ya Muntu mosi, Yesu Klisto, Kento ya makwela mpe Nzutu, na nzutu ya kuvutuka ya Mfumu Yesu. Na kusalaka bambala ya Yandi tatu. . . Ntangu ba nataka Yandi na zulu ya ntoto; kufwaka, kukomamaka, kuvumbukaka.



Kumonisamaka Yandi mosi na mutindu ya Nzutu ya Yandi, yina kele Kento ya Yandi ya makwela, Kento. Beno me bakula yawu? Kento kele ndambu ya Nzutu ya Yandi.

Mpe kento mpe bakala kele kaka kintwadi pene-pene, tii bawu kele kaka na kutala. . . Bawu kele mosi. Ba fwana vwanda, na mutindu nyonso. Bawu yina kuna, beno me mona, bawu ke monisama kaka kieleka mutindu mosi. Yandi kele ndambu ya yandi, samu ti ba basisaka kento na bakala.

Mpe bubu yayi ba me basisa Kento ya makwela na nzutu ya Klisto, yina ke na kukotaka na kisalu mpe ke na kusalaka kaka kieleka mutindu Yandi tubaka ti Yawu ke sala samu na kilumbu yayi, Kento ya makwela, Ntinu ya kento; Ntinu mpe Ntinu ya kento. Mbote mingi.

Beto ke luta ngunga awa, na yawu beto fwana sala nswalu na kumanisa.

<sup>143</sup> Mbote mingi, Biblia ya muvimba kele luzayikisu ya muvimba ya Yesu Klisto, na kuzabanaka Yandi mosi na konso nsungi. Yandi salaka Yandi mosi kuzabana na bilumbu ya Luther, mutindu lufulu; dibuundu, dikulu, makulu.

Mutindu Yandi salaka Ntinu Nebucadnetsar; beno ke bambuka moyo mutindu yandi lotaka bandosi yina, mpe katukaka yintu na kukulumukaka? Beno me mona? Ntangu yayi Yandi ke katuka makulu ke na kumata. Beno me mona? Na kimfumu ya Babybone Yandi talisaka Ngwisani nyonso yina ya Ntama, Yandi katukaka yintu na kukulumukaka, tii ntangu Yandi kulumukaka ti Nzambi Yandi mosi kumaka nsuni na dikulu ya kikalu. Ntangu yayi awa na Ngwisani ya Malu-malu, Yandi ke vutula Yandi mosi mbala mosi dyaka, na Yintu dyaka, Yintu ya wolo, yina ba ke byadisa. Beno me mona? Beno tala. Beno me bakula yawu?

Beno me mona, Nzambi vwandaka na mbandukulu, mpe Yandi landilaka na kukulumuka, na nzila ya bapofete, mpe kulandila, tii ntangu Nzambi Yandi mosi kumaka muntu mutindu beto, kuna na yisi ya kikalu, Bebe me butuka na kidikilu; ya kuyina, ya kulosa, ya kumanga, mpe ya nkumbu ya yimbi, mpe nyonso Yandi vwandaka. Na manima Yandi bandaka na kukula, beno me mona, mpe na makulu Yandi bandaka na kutunga Dibundu, Kento ya makwela, na kuvutukaka, na kuvutukaka; mpe ntangu yayi ke sala Ditadi ya yintu, kisika yawu nyonso ke vukana kintwadi mpe ke sala Nzutu ya nene ya kuituka ya Yesu Klisto.

<sup>144</sup> Nzambi ke monisamaka na nsungi nyonso na nzila ya Ndinga ya Yandi ya kusila na nsungi yina. Ntangu yayi beto tala kaka yina mwa bansilulu ya Yandi kele samu na bubu yayi, na yina beto ke sukisa ntangu yayi na bampova yayi ya nsuka.

<sup>145</sup> Ntangu yayi Nzambi ke na kumonisamaka Yandi mosi na Nsemo ya ntangu ya nkokila. Beto tala ntangu yayi. Beto ke mona . . .

<sup>146</sup> Mu kele kaka na kikunku ya Masonuku ya kusonama awa. Mutindu beno lenda mona na paze yayi, lutangu ya Masonuku ya kusonama awa. Kasi, beto me bikana kaka na bamuniti kumi na tanu tii midi. Mu zola kumanisa. Mpe mu me kangama ve ndinga, na suka yayi, na kuzonzaka. Bantangu yankaka klimatizere yayi awa ke kangimisaka munu mingi ndinga.

Na yawu kana Mpangi Neville kele ve . . . Nge me kubika ve kima samu na nkokila yayi? [Mpangi Neville me tuba, “Ve.”—Mu.] Mbote, mbote, mu ke . . . Kana ya kele nyonso mbote, mu kele na kima mosi. Mu talaka pake ya sigalete mosi, kilumbu yankaka yina, na zulu ya bayinti; mpe mu kuzwaka Nsangu mosi na nzila ya pake yina ya sigalete, samu na nkokila yayi, kana Mfumu kuzola. Beno me mona?

Na yawu, mu kele na Masonuku yayi awa. Mpe mu zola ve kubumba beno mingi, samu beno vutuka.

<sup>147</sup> Pake ya sigalete, yina ke zonzaka. Mbote mingi. Mu bandaka na kutambula na mfinda, mpe kuna vwandaka na pake ya sigalete mosi, mpe mu landilaka kaka na kutambula. Mu banzaka, “Mbote, ya kele na muntu na mantwala ya munu.”

Mpe Kima mosi tubaka, “Vutuka mpe lokota yawu.”

Mu banzaka, “Kulokota pake ya sigalete? Munu ve.”

Kima mosi tubaka, “Vutuka mpe lokota pake ya sigalete yina.”

Mpe mu kwendaka kuna, ya vwandaka na pake mosi ya ntama ya mpamba, mpe mu monaka kima mosi. Mu ke tubila beno na yawu, na nkokila yayi, kana Mfumu zola. Mbote mingi.

<sup>148</sup> Ntangu yayi beto ke zonzila na zulu ya Bansemo ya nkokila, kaka samu na mwa ntangu fyoti. Biblia ke samuna na ntwala ti ya ke vwanda na ntangu mosi ke kwiza, kaka na ntangu ya nsuka, ti mwini ke basika, mpe ya ke vwanda na Nsemo ya nkokila. Beto nyonso zaba yawu. Mutindu yina ve? Beto, beto kele . . . Beto bayina kele ya kumesana na Nsangu ya beto bubu yayi ya Mfumu Yesu, beto ke kwikila ti ya ke vwanda na Nsemo ya nkokila. Mpe Nsemo yayi ya nkokila . . .

Ya kieleka, Nsemo ya nene ke kwiza ntangu Yesu Yandi mosi ke talana awa na zulu ya ntoto, to kuna na Mazulu, na ntangu ya kubaka Kento ya Yandi ya makwela, mpe na manima ke vwanda Millenium.

<sup>149</sup> Kasi beto kele na mosi ya bantangu ya kulutila boma ya kusabuka, yina me vwandaka ntete ve na ntwala ya bantu. Mpe mu ke na kuingila kaka na ngunga, mpe ntangu beto lenda kuzwa . . . muntu nyonso lenda kuzwa siansi kisika beno ke kuzwa konze na kusalu mpe kuzwa bilumbu fyoti, mpe beto lenda

wwanda kisika mosi kisika mu lenda zonza na zulu ya Bampasi yina mpe bima yina ke kubwa na bilumbu ya nsuka; mpe kulutisa na kutala basabala zole to tatu kintwadi, mpe kunata yawu kintwadi, kana Mfumu kubika munu kuzinga samu na kusala yawu mpe kutwadisa munu na kusala yawu, kumona mutindu bima yina ke talana, mpe Banzasi yina. Kuna beno ke bakula yina muntu yina mpe bantu yina vwandaka lota, mpe bima yayi nyonso kuna, ya ke salama; beno me mona, beno ke tala yina yawu ke talisa, Nzasi yina ya nene basikaka na—na mazulu. Ntangu yayi, ya kieleka, nkonga nyonso ya beno, beno zaba ti mu zaba yina ya—yina ya zola kutuba, beno me mona. Mpe, kasi beto vingila kaka tii ntangu ke kwiza, beno me mona, samu ya ke wwanda, beno me mona, ntangu yayi, mpe ya ke wwanda kieleka na nsungi.

<sup>150</sup> Ntangu yayi, na yawu beto ke tanga na kati awa mwa Masonuku yayi—yayi. Ntangu yayi, na Bansemo ya nkokila ke kwiza, ntangu yayi, beto ke tala ti ya fwana wwanda Nsemo mosi yina vwandaka na suka.

Samu ti, ya kele ve na mwini mosi na suka mpe mwini yankaka na manima ya midi. Ya kele mwini mosi. Mwini mosi yina kele na manima ya midi kele na suka; mutindu mosi na suka mutindu mosi na manima ya midi.

Ntangu yayi, Yawu tubaka, “Kilumbu yawu mosi,” kilumbu na kati-kati ya ntangu yina, “ke wwanda mutindu, oh, mutindu kilumbu ya mudidi, ya mpimpa. Ba lendaka bokila ve kilumbu to mpimpa, na kati-kati ya yawu.”

<sup>151</sup> Beno me mona, yina kele kusala ya Nzutu, kubanda na makulu, ke mata. Ntangu Yandi vwandaka awa na zulu ya ntoto, Yandi vwandaka Mwana, Nsemo, na manima ba kufwaka Yandi. Dibuuundu bakaka kisika ya Yandi, na manima ba—martyre mpe lutaka na Bansungi ya Mpimpa, mpe bandaka na kutunga na zulu ya lufulu yina talanaka. Na yina wapi kisika kumona ke katukaka? Na zulu ya yintu.

Beno me mona vision yina; ya Nebucadnetsar? Beno ke mona Yandi kukulumuka, na mbandukulu ya nsungi ya Bantu ya makanda ntete Menga kubasika samu na bawu mpe kukatula-masumu. Bawu vwandaka mindimi. Kasi beno tala ya kulukumukaka kaka, kulukumukaka kaka, kulukumukaka kaka tii na yisi, na kidimbu, beno me mona, tii na yisi.

Na manima ya me banda na kuvutuka, na kuvutuka, Dibuuundu me vutuka kubanda na makulu, me mata. Ntangu yayi ya kele na ntangu ya yintu—ntangu ya yintu. Ntangu yayi beno tala Nsemo.

<sup>152</sup> Beno lenda ve kumona na maboko ya beno, ata ti ya kele ndambu ya nzutu. Beno lenda ve kumona na makutu, ata ti yawu lenda kuwa. Beno lenda ve kumona na mbombo, ata ti yawu ke kuwaka nsunga. Beno lenda ve—beno lenda ve kumona na

bikoba, ata ti ya ke zonzaka; beno me mona, yina vwandaka nsungi ya Pentecote. Kasi ntangu yayi ya kele ntangu ya disu, ya kumona. Beno me mona? Ntangu yayi, ya kele ve na lenda mosi na manima ya disu. Ya kele kieleka?

Yina ke landa kele mayele, ya kele Klisto Yandi mosi, Yina ke twadisaka Nzutu nyonso.

Ata kuningana, kutambula na manima ya yawu. Beno me mona? Nyonso yankaka kuninganaka. Beno me mona? Dikulu ya beno ke ningana, misisa ya beno ya makulu ke ningana, nyonso ke ningana. Ke ningana ya beno . . . Makutu ya beno lenda ningana, mbombo ya beno, bikoba ya beno, mpe nyonso yankaka yina. Kasi na manima ya meso ya beno, ya kele ve na kima ke ningana.

Ya kele samu na yina ba ke tubaka ti babakala ke kumaka na dibandi na nswalu, ya kele samu ti, beno me mona, ya kele ve na bangalalise samu na kuyelisa misisa na—na nsuki, na zulu ya yintu. Beno me mona? Mpe ya kele ve na bakuse samu ti ya kuzwa menga na zulu kuna. Menga ke pompa ve na kuluta, beno me mona, ke mata ve mpe ke pesa menga. Na yina ti, nsuki ke zingaka na nzila ya menga.

Mpe ntangu yayi beto ke tala ti kitini yina, beno me mona, ya kele na kima ve na zulu ya meso.

<sup>153</sup> Ntangu yayi beto tala. “Ya ke vwanda na Nsemo” (na pene-pene na kati-kati ya kilumbu?) “na ntangu ya nkokila!” Samu na yinki Nsemo me fidisama? Samu beno lenda mona kisika beno ke . . . mutindu beno ke tambula. Ya kele kieleka? Kumona kisika beno kele. “Ya ke vwanda na Nsemo na pene-pene ya ntangu ya nkokila.”

<sup>154</sup> Ntangu yayi, beto baka yawu awa mpe beto fwanikisa yawu na Malachie 4. Yandi silaka ti Nsemo ke kwiza dyaka na ntangu ya nkokila, beno me mona, “Samu ti, beno tala, Mu ke tinda beno profete Elie, mpe yandi ke vutula bana na batata, mpe batata na bana,” (ya kele kieleka?) “na boma ti mu kwiza mpe kusemba ntoto na nsingulu.”

<sup>155</sup> Ntangu yayi beto baka Jean to . . . Santu Luc 17:30, mpe beno tala yina Yesu pesaka profesi kuna, na kutubaka ti, “Mutindu ya vwandaka na bilumbu ya Sodome, ya ke vwanda mutindu mosi . . .”

Ntangu yayi beno bambuka moyo, beno tala, yayi kele na ntangu yina Mwana ya muntu ke monisama; kumonisama ya Mwana ya muntu. Ntangu yayi, Mwana ya muntu kumonisamaka na kutala, kaka na mwa ntangu fyoti kuna, kaka na ntwala Sodome kuzika na tiya. Ntangu yayi, Muntu yina vwandaka Elohim. Yina vwandaka Nzambi; mpe Yesu kele Nzambi. Mpe Nzambi kumonanaka na kutala kaka kuna mwa ntangu fyoti, samu na kuzonza na Abraham, kufyongonina samu na lufundusu. Kaka na mwa ntangu fyoti, Mwana ya

muntu kumonisamaka; Mwana ya muntu, Elohim. Beno ke mona yawu, dibuundu? [Dibuundu me tuba, "Amen."—Mu.] Mwana ya muntu, Elohim, kumonisamaka kaka na mwa ntangu fyoti. Samu ti, suka yina landaka zikisa yawu na tiya, (na wapi ntangu?) ntete mwini kutelama dyaka.

Na yawu ya lenda vwanda dyaka ve na organisation, to dyaka ya lenda vwanda na kukwenda na ntwala mosi kulutila yina ke na kusalamaka ntangu yayi, samu ti ya ke zika ntete kilumbu kutelama dyaka. Reveil me suka, na kizunga ya yinsi. Ya ke vwanda dyaka ve na ba-reveil, ba-reveil ya nene yina ke komba; ata mbala mosi dyaka yinsi yayi ke kuzwa yawu. Beno lendaka kuzwa kuvukana ya bantu ya mayele. Kasi, mu zola tuba, reveil ya Kimpeve, beto me mona nyonso ya yawu. Mu banza ti beno ke na kusimba yawu. Mu ke na kutuba yawu na mutindu yina—yina mu banza ti beno ke bakula yawu. Beno me mona? Ya me suka.

Mulongi mosi ya mbote tubaka, mwa ntangu fyoti me luta, yandi tubaka, "Mpangi Branham, kana mu lendaka kaka kuzwa kyese ya Mfumu na kati ya ntima ya munu!"

Mu tubaka, "Mwana, reveil me suka." Beno me mona?

<sup>156</sup> Ntangu yayi ba me tula bastabilizatele na maswa. Bitembo ya nene ya boma kele awa na ntwala ya beto; kasi beto zaba, kaka na manima ya kitembo yina kuna, beto ke kuma pene-pene ya simu. Beno me mona? Beto ke kuma pene-pene ya simu. Beno vwanda ya kusikama. Beno vwanda kaka na kati ya Ndinga. Beno vwanda na Nzambi. Ata mutindu beno ke kuwa, yina ke salama; beno vwanda kaka na Ndinga. Ti—ti—ti ya vwanda ya kusikama, ntangu beno ke mona matuti nyonso ya nene yayi ya ntama kuzungidila beto, mpe bitembo kukwiza, mpe ba-bombe atomique, mpe nyonso yina ba ke na kuzonzila. Kasi stabilizatele ya beto kele kaka ya kusungama na kati ya Ndinga. Nzambi tubaka ti ya ke vwanda awa; beto ke sabuka mosi na mosi ya bantunga ya yawu. Yinga, beto ke luta kaka na zulu ya yawu. Yinga, ya kieleka! Yawu, yawu lenda ve kudiamisa beto. Yawu lenda ve kufuka beto. Beno kotisa beto na ntoni; beto ke basika dyaka. Yawu yina kaka. Ya kele ve na mutindu mosi na yinza na kubumba yawu na yisi kuna. Beto ke sabuka mosi na mosi ya bantunga ya yawu, samu ti Mfumu Kapitene ya beto ya nene ke na kubokilaka na simu yina yankaka.

Beto kele ya kukangama na Yesu, mu ke telemina bitembo ya luzingu;

Mu me kangama na Yesu, mu kele na boma ya mupepe to ya kitembo ve;

<sup>157</sup> Ata yina lendaka vwanda, ti ya kwiza. Yina lendaka vwanda, yina ke vwanda, ya ke sala ata luswaswanu ve. Beto kele kaka ya kukangama kuna na Yesu. Kana mu zinga, mu ke zinga samu na nkembo ya Nzambi. Kana mu kufwa, kuna mu lendaka kufwa samu na nkembo ya Nzambi. Mu—mu—mu ke zola kaka... Ya

kele samu na nkembo ya Nzambi, ya kele yina mu zola kusala. Ntangu yawu nyonso ke mana, mu zola dyaka ve kuvwanda ntangu ya yinda. Mu zola kukwenda na kisika . . . na musendo ya munu yina Yandi sumbaka samu na munu; ve yina mu me fwana, kasi yina Yandi sumbaka samu na munu, yina Yandi pesaka munu na lemvo ya Yandi.

<sup>158</sup> Na yawu beto ke mona Nsemo ya nkokila awa. Mpe yinki ya ke sala na kuzwa Nsemo, kana beno kele ve na meso ya kumona mutindu ya kutambula na Yawu? Yinki kele Nsemo ya nkokila yayi? Nsemo ke kwizaka, samu na kumonisa kima. Ya kele kieleka? Kana ya kele na kima *awa*, beno ke na kuwa mpe beno lenda ve kubakula yina ya kele, na mpimpa, na yina beno pelisa nsemo. Ya kele samu na kumonisa! Yinki ke sala Malachie 4? Beno me mona? Ke sala kima mutindu mosi. Yinki zolaka sala kuzibuka ya Bidimbu Sambwadi, kisika badenomination nyonso yayi ke na kubembila na yayi . . .? . . . Ya kele samu na kumonisa, kubasisa. Kana beno kele ve na meso, na yina wapi mbote ya kumonisa? Ya fwana vwanda na meso, ntete, na kumona. Ya kele kieleka? Samu na kumonisa Malachie 4, na kumonisa Santu Luc 17:30, Santu Jean 14:12, mpe Jean 15:24, 16:13. Mpe samu na kumonisa dyaka Apocalypse 10:1 tii na 7, kuzibuka ya Bidimbu Sambwadi, mpe Nsangu ya wanzio ya sambwadi; samu na kuzibuka, na kumonisa, ntangu Nsemo ya nkokila ke kwiza. Ntangu yayi kana muntu . . .

<sup>159</sup> Na Nsungi ya Laodicée, bantu vwandaka (wapi mutindu?) “kinkonga.” Bawu kele? “Mpofu.” Wapi mbote Nsemo ke salaka na muntu ya kufwa meso? Kana mpofu ke twadisa mpofu, bawu nyonso ke kubwa na dibulu ve? “Kinkonga, mpofu, mpe zaba yawu ve.” Ata balenda ya bawu ya kubanza me zimbana, balenda ya bawu ya kubanza na kimpeve, lubakusu ya kimpeve. Beno me mona?

“Ya kunatama, ya lunangu, bantu ke zola byese kulutila bantu ke zola Nzambi; bantu ya mayuya, bantu ke zonga yimbi ya bampangi, bantu ke lenda ve kukutika banzutu ya bawu, mpe bambeni ya bantu ya mbote; Na kuvwandaka na mutindu ya kinzambi, kasi ke manga Ngolo ya yawu.” Ngolo ya luzayikisu; bawu ke kwikila mpe ve na yawu. Beno me mona? Bawu ke kwikilaka ve na bima mutindu baprofete. Mpe na yawu bawu ke kwikilaka ve na yawu. Bawu ke kwikila ti—ti Malachie 4 ke vwanda samu na dibuundu mosi to organisation mosi.

Ntangu yandi kwizaka mbala ya ntete, yandi vwandaka muntu. Ntangu yandi kwizaka mbala ya zole, na ndambu ya bambala zole, yandi vwandaka muntu. Ntangu yandi kwizaka na nzutu ya Jean Baptiste, yandi vwandaka muntu. Beno me mona?

Na bilumbu ya nsuka, ntangu Bansemo ya nkokila ke banda na kulezima, meso ke zibuka mpe beno ke mona kisika beno ke na kwenda. Na yina Nzutu me salama yimeni, me telema

na makulu ya yandi, ke na kutambula, ke na kutambula na nzila ya Mpeve-Santu. Yinki? Yandi yina kaka vwandaka na zulu ya baprofete yina sonikaka Biblia, Mpeve-Santu mosi ke na kutambula na kati ya Nzutu ya kufuluka na Mpeve-Santu, ya kupusa na Mpeve-Santu, na kubasika na konso organisation, konso dikanda, ndinga, mpe bantu.

<sup>160</sup> Ntwenya mosi ya mama awa, yandi kele ve ya organisation yayi, to organisation yayi. . . kele ya dibuundu yayi ve. Yandi me katuka kisika yankaka, mpe yandi me kwiza na suka yayi, yandi vwandaka na kifikulu kuna. Yandi vwandaka. . . me pesa yawu na mwana ya munu ya bakala, yina vwandaka me yituka mingi. Mu zaba ve kana yandi me kuwaka na zulu ya Yayi to ve. Mu zaba ve. Yandi vwandaka na kifikulu ya Wanzio yayi ya Mfumu yina vwandaka na Bansungi Sambwadi ya Dibundu, ntangu Bidimbu Sambwadi kuzibukaka, kuna, ntangu yawu kusalamaka. Yandi tubaka, yandi talaka kuna na manima, mpe yandi monaka yawu kutelama na zulu, na ndosi. Mpe yandi talaka na manima kuna mpe monaka yawu, monaka muntu mosi na mpembe, ke kwenda na ntwala; mpe na manima ya yawu, yandi tubaka ti ya vwandaka talana. . . Yandi tubaka, “Mpangi Branham, ya vwandaka nge.” Mpe yandi tubaka, “Mu kotaka kuna na kutambulaka,” yandi tubaka, “na manima ya nge, vwandaka bantu ya bantinta mingi, yina vwandaka nata babendele; ya Georgie, Alabama, ya mutindu nyonso ya bisika, na kutambulaka,” na kumataka na lutwadusu kisika Klisto vwandaka ya kumonisa na vision. Oh, aleluya!

<sup>161</sup> Beto kele na bilumbu ya nsuka, mpe bangunga ya nsuka ya bilumbu. Beno ke mona Yandi ntangu yayi na Ndinga ya Yandi, mpe Ndinga ya Yandi nyonso me monisama kaka awa na ntwala ya beto? Oh, Dibundu ya Nzambi ya moyo, beno fukama, beno kwikila na Yandi na nyonso yina kele na kati ya beno. Beno kangama na mwa Pine yina na kati-kati ya pine, ti Yawu kusikimisa konso kuningana mpe konso kutambula yina beno ke sala. Konso dibanza yina kele na beno, ti ya vwanda ya kutwadisa na Yinzo ya yinda yayi na kati ya beno. Samu ti, Nzambi kele kaka na kati ya Ndinga ya Yandi ya ngunga yayi, na Nsemo ya nkokila, na kulakisaka Nsemo.

<sup>162</sup> Bumpofo ya ngembo! Beno lendaka pelisa mwinda, mpe ngembo—ngembo ke vwanda kaka mpofu ti yandi ke lenda ve kupumbuka. Dikuti, na bawu nyonso ke tambulaka na mpimpa, mpe bima ya mutindu yina, bampese mpe nyonso, lenda ve kumona na ntangu. Ba zaba ve yina nyonso yina kele. Ba lenda mona ve.

Mpe Bansemo ya nkokila me kwiza. Konso kingana, bisika nyonso beto ke kwenda, na yinza, na Biblia, tii na biteki yina Mel- . . . yina Daniel monaka, mpe—mpe ntinu ya kilumbu yina, yina bawu nyonso monaka; mpe bima nyonso yayi, muntu nyonso, nzutu nyonso, movema nyonso, kisika nyonso na Nzutu,

na kutala ke lakisa beto ngunga yina beto ke na kuzingila. Ata movema yankaka lenda kwiza na zulu ya yawu.

Ya vwandaka na movema ya diboko; zola, Wesley. Ya vwandaka na movema, ya lufulu; Luther. Luzolo, ata mbala mosi ve ya me vwandaka na ya kulutula nene; ba bokilaka yawu movema ya Wesley. Ba tindaka ba-missionnaire na yinza ya muvimba. Mosi ya bamovema ya kulutula nene yina ba salaka, na nsungi yina na ntwala ya yawu.

Na manima me kwiza nsungi ya Pentecote; mpe me kwiza misapi ya mutindu na mutindu mpe nyonso, nsungi ya Pentecote, ya bandinga, mpe mbombo, mpe nyonso yina.

Ntangu yayi ya kele na meso. Wapi mbote beno ke sosa meso, to ke vwanda na nsatu ya nsemo, kana meso yina vwandaka ve kuna samu na kumona? Ya fwana vwanda na meso, ntete, na kumona. Mpe kuna ntangu yina ke kwiza, Yandi zibulaka Bidimbu Sambwadi mpe monisaka Nsemo ya nkokila, na kubakaka mansweki nyonso yina vwandaka ya kubumbama na kati ya bansungi ya dibuundu yayi, mpe ntangu yayi me monisa yawu mutindu Yandi silaka na kusala na Apocalypse 10:1 tii na 7. Beto me kuma kisika yango bubu yayi na kati-kati ya Ndinga, mpe Ndinga me monisama na beto na nzila ya Yesu Klisto. Na yina, *Yayi* kele Ndinga ya Nzambi.

<sup>163</sup> Mpe na kuvwandaka bantu ya Yandi, beto fwana tambula pene-pene na Musoniki, samu na kubakula Yawu, samu Yawu kumonikisa. “O Mfumu, yinki Nge zola, ti mu sala? Kana mu fwana kwenda na bilanga mpe kulonga Nsangu ya mbote, to mu fwana vwanda na yinzo? Ata yina ya kele, kana mu fwana vwanda kento ya mbote ya yinzo, kana mu fwana vwanda mama ya mbote, kana mu fwana sala *yayi*, *yina*, to *yankaka* yina? Nyonso yina ya kele, kana mu fwana vwanda kisadi-bilanga, kana mu... Nyonso yina ya kele, Mfumu, yinki Nge zola ti mu sala?”

<sup>164</sup> Ya vwandaka ve yina Saul bokaka kuna, “Mfumu, yinki Nge zola ti mu sala?” Yandi vwandaka na... na nzila ya yandi na—na kutula dibuundu nyonso na boloko. Kasi kuna yandi bokaka, “Yinki Nge zola mu sala?” Ntangu Nsemo kunamaka, mutindu Dikunzi ya nene ya Tiya na zulu ya yandi. “Yinki Nge zola mu sala?”

<sup>165</sup> Mu banza ti ya kele ndinga ya mbote na kusukisa, na kutubaka, “Mfumu, yinki Nge zola ti mu sala? Ntangu mu ke mona Masonuku yayi kumonisama na mutindu ya kulunga kaka ntangu yayi; Mfumu, yinki Nge zola mu sala?”

Beto kulumusa bayintu ya beto.

<sup>166</sup> Mu ke lombana na muntu nyonso na kutala na kati ya bantima ya beno ntangu yayi mpe kukiyufula kyuvu yayi, “Mfumu, yinki Nge zola ti mu sala?” Mpe beno bantu, kana beno kele dyaka ya kuvukana na nsinga ya alo-alo bisika nyonso na yinsi, beno



kulumusa yintu ya beno mpe kukiyufula, “Mfumumu, yinki Nge zola mu sala? Na kumonaka ti beto kele awa na bilumbu ya nsuka mpe na bangunga ya nsuka, kaka na mutindu mingi ya kulunga na ntuala ya beto, ya kumonana kaka pwelele, yinki Nge zole mu sala?”

<sup>167</sup> Nzambi ya luzolo, na yina bawu ke na kuyufulaka Nge kyuvu yina; Mu ke yufula, munu mosi, na Nge, yinki Nge zola mu sala, Mfumumu, mutindu mu ke mona ti konso kilumbu ke na kutangama. Mpe mu ke sambila ti Nge ke sadisa munu, Mfumumu, samu na kuzinga mutindu yina konso kilumbu, ba ke tanga yawu samu na lukumu mpe nkembo ya Nge.

Mu ke sambila ti Nge ke sadisa konso muntu bisika nyonso na yinsi, mpe bayina kele awa na tabernacle mutindu beto ke tala na bantima ya beto mpe ke tuba, “Mfumumu, yinki Nge zola mu sala? Yinki mu lenda sala, Mfumumu, samu na kusala kukwenda na ntuala Kimfumumu ya Nge mpe Dyambu ya Nge?” Pesa yawu, Nzambi.

Tala beto, bantima ya beto, mpe meka beto. Kana ya kele na disumu mosi ya nko na kati ya beto, Mfumumu, munimi mosi, bamotifi to balukanu mosi ya yimbi, O Nzambi, sukula beto na Menga ya Mwana ya Nge, Yesu Klisto, Yina beto ke ndima na kulemvuka nyonso kundima ya munkayulu ya lufwa ya Yandi mpe mvumbukulu ya Yandi. Mpe na kuvwandaka ya kunungisa na kukwikilaka ti Yandi salaka yayi, beto na kyese ke ndima dikani ya mpulusu yina Nge pesaka beto, na beto.

Tata, beto ke tonda Nge samu na Nsangu ya bubu yayi, yina beto ke kwikila mpe na yina beto me kangama, na kuzabaka mpe kukwikilaka ti ya kele Ndinga ya Nge mpe Nsangu ya Nge. Ve samu na kuvwanda ya kuswaswana na bantu yankaka, kasi kumeka na kuvwanda ya kulutila mutindu Yesu Klisto Yina kele kifwanisu ya beto.

<sup>168</sup> Nzambi ya luzolo, awa kele na bamuswale, mpe ya kele na bantu ya kubela bisika nyonso. Mpe munu mosi, Mfumumu, mu me lemba mpe kele dyaka na ngolo ve, na suka yayi. Mu ke sambila ti Nge ke sadisa beto, Nzambi ya luzolo. Beto ke na kutala na ngolo ya Nge. Nge ke Ngolo ya beto. Nge me sadisaka bantu mingi, Nzambi ya luzolo.

<sup>169</sup> Kilumbu yankaka yina, na kubanzaka kuna na kati ya mfinda yina, na kutambulaka na Mpangi Banks Wood, ntangu badokotolo. . . Ntima ya yandi vwandaka yimbi mingi ti yandi na mpasi zolaka tambula. Kuna na kubanza mutindu mu. . . fyoti mu zabaka kuna na zulu, na kutambulaka na myongo yina na manima ya vision yina, “Mu fwana kuzwa nkosi yina. Mu fwana mona kufwa nkosi yina.”

Mpe kuna na kukulumukaka kuna, mpe na kuvwandaka kuna na Tucson, na Furr Cafétéria, mu me mona bilele ya yandi na zulu ya yandi ya kubwa, meso ya kubwa. Mu tubaka,

“Nzambi, kana Nge lenda lakisa vision, kisika nkosi kele, kieleka Nge lenda lakisa yina me tala Mpangi Wood.”

Mpe kuna ya me kwiza, “Tentika maboko ya nge na zulu ya yandi.”

Mpe awa yandi kele bubu yayi, me vutuka, Mpangi ya beto Banks dyaka, na ngolo, yina ke mata mpe ke kulumuka myongo yina. Mutindu beto ke tonda Nge, Nzambi ya luzolo. Nge kele Nzambi mosi na beto nyonso mutindu Nge ke vwanda na Mpangi Wood. Mu zaba ti Nge ke zola yandi, samu ti yandi kele kisadi ya Nge, ya kieleka mpe ya kusungama.

<sup>170</sup> Mpe mu ke sambila, Nzambi ya luzolo, ti Nge ke sala na mosi na mosi ya beto, mpe ke lemvokila masumu ya beto, mpe ke belusa bimbevo ya beto ya banzutu ya beto. Sala beto ya kulutula mutindu Nge, kilumbu na manima ya kilumbu, Mfumu, tii ntangu beto ke kuma na ntela ya muvimba ya Yesu Klisto. Pesa yawu, Mfumu. Mu ke na kivuvu ti Nge me tala ntima nyonso, ntangu yayi, mpe beto zaba yina ya kusala. Beto ke lomba Nge na kusakumuna beto ntangu yayi, na Nkumbu ya Yesu.

<sup>171</sup> Mpe na yina beto kele na bayintu ya beto ya kukulumusa, ya kele na muntu awa, to kuna bisika nyonso na—na yinsi na nzila ya alo-alo, yina ke zola kaka, na yina beno ke na kusambila, mpe yintu ya beno ya kukulumusa, beno telemisa kaka diboko ya beno na Nzambi ntangu yayi. Ya kele kaka yina beno lenda sala; bantu mingi kele awa na suka yayi. Beno telemisa kaka diboko ya beno na Nzambi, beno tuba, “Nzambi, sala munu ya kulutula mutindu Yesu. Mu—mu zola kuvwanda ya kulutula mutindu Yesu.” Nzambi kusakumuna beno. Kuna bisika nyonso na yinsi, maboko kaka bisika nyonso, kaka lutangu mosi ya ngolo. Mpe, ya munu kele ya kutelama. “Mu zola kuvwanda ya kulutula mutindu Yandi. Tala munu, Mfumu, mpe tala kana ya kele na mpeve ya yimbi na kati ya munu; basisa yawu. Mu—mu zola. . .” Yinki? Beto kele kaka awa samu na ntangu mosi, dyaka beto fwana kwenda ata ti beno kele. . .to, ata nyonso yina beno kele, mutindu mvwama, mutindu mputu, mutindu ntwenya, mutindu ya kukula.

<sup>172</sup> Mu vwandaka mazono na mwa, nkonga mosi ya bantu ya mputu kuna na mongu, kuna na. . . na mwa-maza. Ya vwandaka na mwa dibuta mosi kuna, bakala yina mu ke zonzilaka, ntangu mingi na yina me tala Nzambi. Kwizaka, mwa kento ya yandi, bana ya yandi sambwadi to nana; yandi, mwa kima ya fyoti, ya kukonda, ke meka na kusala kuna, samu na ba-dollar zole to tatu na kilumbu. Mpe muntu mosi bikaka yandi kuzinga na mwa kabane. Mpe kento ya yandi na zulu kuna, na kutala me belama na kuzwa mwana yankaka, mpe yandi vwandaka na nsoka mosi ya nene kuna, vwanda zenga yinti, samu na kupasula yawu; bebe na luketo mosi, vwanda benda yinti na diboko yankaka; kwizaka samu na kuzenga yinti yina, samu na kutula na bambungu mwa

bambuma ya ba-mûre, samu na kukima nsatu na nsungi ya hiver. Oh, mutindu beto vwandaka tala yandi kyadi! Mpangi Wood mpe munu kwendaka baka kaminio, mpe kwendaka kuna mpe zengilaka yandi bayinti, mpe kotisaka yawu. Yandi, mwa kento mosi ya lutondo, yandi vwandaka kaka ya kutelama kuna. Mu vwandaka tala yandi kyadi. Mpe beto landilaka na kusambila samu na bawu.

<sup>173</sup> Mpe mwa bebe ya yandi kuzwaka épilepsie. Beto kwendaka mpe beto sambilaka samu na mwa bebe yango, mpe Nzambi belusaka yandi. Mpe kilumbu yankaka yina, bakala ya yandi kuzwaka hernie, mpe mu kwendaka na . . .

Mu vwanda zonzaka na yandi. Yandi vwanda kunwaka makaya, bawu zole. Kento vwanda bakaka tabaka, mpe bakala mpe, mutindu ya bantu ya mongo. Mpe kuna mu vwanda landilaka kuzonza na bawu na zulu ya yawu. Mpe mazono na suka ntangu mu kwendaka, na kutala na suka-suka, awa yandi me kwisa, ya kusimba maboko ya yandi kintwadi, mpe yandi tubaka, “Mpangi Billy, mu me kuma muntu me soba.” Yandi tubaka, “Mu me kunwa sigalete ya munu ya nsuka, mpe mu me kuma na lweka ya Mfumu.”

Kento tubaka, “Mu me kunwa mpe, ya munu ya nsuka.”

Oh, kuna nkuna! “Munu Mfumu me tula maza. Mu ke tula yawu maza ntangu mpe mpimpa, samu muntu ve kubotula yawu na maboko ya Munu.”

<sup>174</sup> O Nzambi, lemvokila munu ntangu yayi, mu ke sambila, mpe pesa beto nsatu ya ntima ya beto, samu ti na bantima ya beto beto zola kusadila Nge. Ntangu yayi, Tata, bawu nyonso kele na maboko ya Nge, bisika nyonso. Bawu kele bana ya Nge. Sadila na bawu landila kyadi, Mfumu; ve na lufundusu, kasi na kyadi. Beto ke lomba na Nkumbu ya Yesu. Amen.

<sup>175</sup> Beno zola Yandi? [Dibuundu me tuba, “Amen.”—Mu.] Na ntima ya beno nyonso! Ntangu yayi, beno bayina kele na bamuswale, beno lenda kwiza baka yawu.

Mpe ntangu yayi, balukutakanu ya beto, mu banza ti bawu ke bandaka mwa ngunga na ntwala, na ngunga ya sambwadi, to kima ya mutindu yina. Mpangi Neville ke samuna yawu, kaka na mwa ntangu fyoti, na zulu ya ntangu ya kubanda.

Ya kele na mbotika, mu banza, na suka yayi? [Mpangi Neville me tuba, “Maza kele.”—Mu.] Maza kele, kana muntu kele awa mpe me botamaka ntete ve na Nkumbu ya Mfumu ya beto Yesu Klisto, mbote, ya kieleka ya kele . . . Maza samu na kubotika kele.

<sup>176</sup> Beto ke sepela na bampangi nyonso ya milongi. Mu ke mona Mpangi . . . Wapi mutindu vwandaka lukutakanu ya nge, ya vwandaka mbote, Mpangi Parnell? Mpe Mpangi Martin, mpe, oh, bawu mingi awa, Mpangi Lee Vayle. Oh, ya kele kaka na

milongi bisika nyonso na kisika. Kieleka beto me sepela na kuzwa beno awa, na kubundanaka na beto na Ndinga.

<sup>177</sup> Mu banza ti beno lendaka wisana ve na munu kaka na Yayi; mu ke lomba beno na kuvwanda ve, beno me mona. Kima mosi kaka, beno zitisa Yawu. Yina beno ke tubaka na munu, mu ke zitisaka yawu. Kana milongi ke baka bande, mpe bawu ke tuba, “Mbote, mu ke wisana na yandi ve.” Ya kele nyonso mbote, mpangi ya munu. Mu banza beno kele muvungi mosi ya mameme; beno—beno ke dikisa bawu nyonso yina beno zola.

Mu ke na kumeka na mutindu nyonso na kuvwanda kaka na Ndinga, samu ti bayayi me tulama na maboko ya munu samu na Nzambi, samu mameme ke zolaka madya ya mameme, ya kieleka. “Mameme ya Munu ke kuwaka Ndinga na Munu.” Mpe ya kele na yina beto ke zingila, na Ndinga nyonso yina ke basika. . . Ve nyonso. . . Ve kaka Ndinga awa mpe kuna; kasi Ndinga nyonso ke basika na yinwa ya Nzambi, ya kele na yina basantu fwana zingila.

Beto telama ntangu yayi. Na yina beto ke kulumusa bayintu ya beto. . .

Mpe Mpangi Neville, nge kele na kima yina nge zola kutuba na bawu? [Mpangi Neville me tuba, “Ve.”—Mu.] Mpangi Mann? Mbote mingi.

Muntu nyonso ke kuwa mbote? Beno tuba, “Amen.” [Dibuundu me tuba, “Amen.”—Mu.] Mbote mingi.

Ntangu yayi beto kulumusa bayintu ya beto.

Mu ke lomba na Mpangi Lee Vayle kana yandi lenda belama awa, kana yandi lenda. Kana nge lenda kwiza awa, Mpangi Vayle, kana nge lenda.

Mpangi Vayle kele mpangi ya beto awa, musoniki ya babuku. Mpe yandi ke na kukubikaka ntangu yayi, buku ya *Bansungi Sambwadi ya Dibuundu*, mpe ke na kusalaka na *Bidimbu Sambwadi*. Mpe beto ke na kivuvu na kuzwa yawu na bilumbu fyoti. Mbote mingi. Mpangi Lee Vayle.

Nzambi kusakumuna nge.



*KLISTO ME MONISAMA NA KATI*  
*YA NDINGA YA YANDI MOSI* KNG65-0822M  
(Christ Is Revealed In His Own Word)

Nsangu yayi ya Mpangi William Marrion Branham, kulongamaka na Kingelesi, na Lumingu na suka, na kilumbu ya 22 ya Ngonda ya nana, na mvula 1965, na Branham Tabernacle na Jeffersonville, Indiana, U.S.A., yina bakamaka na bande manietiki mpe basisamaka na muvimba nionso na buku na Kingelesi. Lubangulu yayi na Kikongo basisamaka na buku mpe ba kabulaka yawu na Voice Of God Recordings.

KIKONGO-KITUBA

©2022 VGR, ALL RIGHTS RESERVED

VOICE OF GOD RECORDINGS  
P.O. Box 950, JEFFERSONVILLE, INDIANA 47131 U.S.A.  
[www.branham.org](http://www.branham.org)

## Luzabusu samu na kubasisa mikanda

Muswa nionso kele ya yandi. Muntu nionso lenda kubasisa buku yayi na masini ya yandi ya yinzo samu na yandi mosi, to kukabula yawu ya mpamba, mutindu kisdilu samu na kumwangisa Nsangu ya mbote ya Yesu Klisto. Ba lenda tekisa buku yayi ve, kubasisa yawu na lutangu ya kulutila mingi, kutula yawu na site internet, kubumbisa yawu na kibumbulu ya bansangu, kubangula yawu na bandinga yankaka, to kulomba mbongo kukondwa muswa yina me sonama na Voice Of God Recordings®.

Na yina me tadila bansangu ya kulutila mingi to samu na yina me tadila bisadulu, beno sonikila:

VOICE OF GOD RECORDINGS  
P.O. Box 950, JEFFERSONVILLE, INDIANA 47131 U.S.A.  
[www.branham.org](http://www.branham.org)